



PAHAYAGAN SG PARTIDO KOMUNISTA SG PILIPINAS-ISLA SANG NEGROS
GINAUBAYAN SG MARXISMO-LENINISMO-MAOISMO

ANG

PAGHIMAKAS

REGULAR NGA ISYU

ENERO-MARSO 2014

EDITORIAL

45 Ka Tuig Sg BHB, Padayon Nagaani Sg Kadalag-An Sa Pag-Abanse Sa Estratehikong Pagkapatas

45 ka tuig nga ginalunsar sg pumuluyong Pilipino ang pungsodnon demokratikong rebolusyon paagi sa pangmalawigon nga inaway banwa kag may panguna nga porma sg armadong paghimakas. Marso 29, 1969, gintukod ang Bag-ong Hangaway sg Banwa sa idalum sg absoluto nga pagpamuno sg Partido Komunista sg Pilipinas – Marxismo-Leninismo-Maoismo.

Sa pag-angkon sg matuod nga hangaway sg pumuluyo paagi sa BHB, nahatagan sg katumanan ang handum sg pumuluyo nga wasakon ang mapiguson kag mahimuslanon nga sistemang mala-kolonyal kag malapyudal sa idalum sg imperyalismong Estados Unidos, tumandok nga pyudalismo kg



burukrata kapitalismo kg konsolidahon ang gahum pampulitika agud tukuron ang demokratikong gahum sg pumuluyo.

Ang Pagtukod kag Pag-abanse sg BHB sa Negros. Indi mahamulag sa pungsodnon nga pag-usbong sg rebolusyonaryong balud, nabun-ag man sa Negros ang rebolusyonaryong proletaryong paghimakas sg pumuluyo sg gintukod ang mga yunit sg Partido, rebolusyonaryong organisasyon masa kg Bag-ong Hangaway sg Banwa, gikan sa kabukiran, kaigangan, kapatagan kg bisan sa kasyudaran. Nangalapkap sa bilog Isla ang kalayo sg armadong paghimakas. Matuod, nagnugurob ang bulkan sosyal sa Isla sg Negros kun diin mapait ang katam-is sg kalamay Sa una nga bahin sg dekada 70, natukod ang pundasyon sg rebolusyonaryong kahublagan sa Negros paagi sa legal nga kahublagan masa sa urban kag panugod nga pagpundar sg armadong paghimakas sa kaumhan sg Southwest nga bahin sg Isla sg Negros sg gintukod diri ang una nga larangan gerilya. Nalab-ot ang malapad nga baseng masa sa anum (6) ka banwa sg Southwest nga larangan. May panugod man nga pagbukas sa bahin sg Southeast, Central kg Norte sg Negros.

Apesar sg wala sa panahon nga aksyon militar nga wala pa sg baseng masa sa Norte sg Negros sadtong temprano nga bahin sg 1970s, nagsignal ini sg panugod sg armadong paghimakas sa Isla sg Negros. Ang sayop sa kakulang sg panugod nga pagpanayasat sosyal kag pag-analisa sg sahi, panguna nga sayop sa ini nga panahon nga gilayon naman natadlong.

Bangud sg obhetibong kahimtangan sg Isla kag husto nga linya sg PKP kag Hukbo, madasig ang solido kg komprehensibo nga pagsulong sg rebolusyonaryong armadong paghimakas sa una nga bahin sg dekada 80. Nalab-ot ang halos 2/3 sg bilog nga kalaparon sg Isla.

Naglapad ang mga larangan gerilya. Tatlo sini ang ara sa Southwest, duha sa Sentral, isa sa Southeast kg isa sa Norte.

Nalunsar sang mga platun kag mga iskwad ang malapnagon nga taktikal nga opensiba. Nga ang pila sini nagmarka sa bilog Pilipinas, katulad sg pagkawipe-out sg Scout

PANAWAGAN

Sa pagpauswag sang aton Ang PAGHIMAKAS, inapangabay sa tanan nga bumalasa sini nga mag-amot sang mga balita, piktyur, istorya kag iban pa nga sinulat. Ginapadangat man nga ang mga amot-sinulat mapadala isa ka bulan antes sang Marso, Hunyo, Setyembre, Desyembre sang kada kwarter. Nagapangayo man kami sang inyo mga suhestyon kag komentaryo paano pa gid ini pauswagon.

KAUNDAN SINI NGA ISYU

Editoryal: 45 ka Tuig sg BHB, Padayon Nagaani sg kadalag-an Sa Pag-abanse sa Estratehikong Pagkapatas
Mensahe sg mga Larangan sa ika-45 nga Anibersaryo sg BHB - 8
Mensahe sg NDF-Negros -15
Mga Tulungdan sa Pag-away -17
Feature: Peke nga Repormang Agraryo Nagapasingki sa Paghimakas sg Mangunguma sa Duta sa Banwa sg Murcia -21
Kawad-On Sg Pangabuhian Sg Mangunguma Idalum Sang Negros First Ranch Ni Maranon, Jr., Nagapukaw Sg Armadong Paghimakas-25
PKM Statement - 29
Pabakuron ang Kontra-Pyudal nga Nagahiliugyon nga Prente - 32
Balita - 37

Ranger sa Banwa sg Isabela kag ang pag-raid sa Visasyan Maritime Academy (VMA), kun diin nakakuha sg masobra 400 ka Garand Rifle. Malapnagon ang pagsulong sang mga kontrapudyal nga kampanyang masa nga nagresulta sa 400,000 nga kadamuon sang baseng masa sa kaumhan sa diin ang SOM sini naglab-ot sa mga 128,000. Nagbakod ang mga larangan gerilya dira sa pagkatukod sang madamo nga mga sanga sang Partido sa lokalidad.

Naglab-ot sa masobra 700 ang regular nga katapuan sg BHB nga kadam-an naghalin sa mga mamumugon sa kampo. Duso sg tuman ka pait nga kahimtangan sa asyenda sg katubuhan kg sa mga kadalag-an nga naangkon sa mga paghimakas sa pag-angkon sg mga farmlots kg mas mataas nga sweldo kg benepisyo sa mga asyenda, madamo nga mga pamatan-on halin sa asyenda ang nag-upod sa armadong paghimakas kadungan sg paglig-on sg pagpamuno sg Partido sa mga asyenda.

Nalab-ot ang mga kadalag-an bangud sa pagtib-ong sang mga sandigan nga prinsipyo sang Partido kag pag-aplikar sa lokal nga kondisyon sang MLM bilang teoritikal nga ubay, pagtuon sa mga dokumento sa Unang Dungganon nga Kahublagan Panadlong kag padayon nga pag-usoy sa linya sang Pungsodnon-Demokratikong Rebolusyon paagi sa malawigon nga inaway banwa sandig sa ispisipikong ubay sang SCPW kag OUT, pagtigayon sang pagsuma sa rebolusyonaryong inagihan sang Negros Subregional Committee (NSRC) panahon sang '70s, pagtigayon sang kampanya sa pagtuon sang BKP kag pagtigayon sang rehiyonal nga sosyal imbestigasyon sa kaumhan kag pag-analisa sa sahi.

Tuman ka paborable ang sitwasyon sa ini nga panahon bunga sg grabe nga pagkadiskontento sg pumuluyo sa US-Marcos nga diktadura. Labi nga nag-ibwal ang pumuluyo sa pag-asasinar kay Ninoy Aquino sg 1983.

Apang, kadungan sg mga naangkon nga kadalag-an, amat-amat man nanalupsop ang sayop nga pag-analisa sa sosyedad Pilipino. Sang 1983, napirme ang sayop nga pag-analisa sa moda sa produksyon sg pungsod nga amo ang gintungtungan sg Red Area-White Area (RAWA) nga konsepto nga naghalit sa rebolusyonaryong kahublagan sa bug-os nga pungsod lakip na sa Negros. Ini man ang basehan sg mga isplitista sadtong 1987.

Ang konsepto sg RAWA nga nagsugod sa Mindanao kg gin-aprubahan sg Pungsodnon nga Sentro, nagdulot sg kahalitan sa bilog nga rebolusyonaryong kusog – pagkawasak sg baseng masa, pagkalusaw sg mga Sanga sg Partido sa Lokalidad kg pagbuhin sg pwersa sg BHB.

Ang Halit sg Sayop nga Linya. Sang 1980s, nangin patag-awayan ang bilog nga Isla sg Negros bangud sg estratehiyang “giyerang prente “ bunga sg eklektisismo. Bugso sg petiburges nga impetusidad nga nagadali sg kadalag-an nakigtaksanay ang mahina pa nga rebolusyonaryong kusog batuk sa mabaskog nga kaaway. Nagdamgo ini nga madasig maagaw ang estado poder paagi sa dalagkuan nga aksyong militar sg Hukbo kg insureksyonismong aktibidad sa mga syudad kg banwa.

Indi lang ini nagtuga sg kahalitan sa Partido, hukbo kg masa. Nakatuga man ini sg pagkalibog sa mga matuod nga proletaryong rebolusyonaryo. Ang BHB sa idalum sg “gyerang prente” nga konsepto nagserbe na lang nga lubos nga pang-away nga pwersa kg nalgwin sa hilikuton masa. Nanalupsop todo ang linya sg insureksyonismo kg adelantadong regularisasyon. Samtang todo bira naman ang mga partisano sa kasyudaran nga nagtuga sg halit sa legal kag depensibong kahublagan masa.

Salamat sa Kahublagan Panadlong! Bisan pa nga ang Komiteng Rehiyon sa Negros upod sa Sekretaryo sg Visayas Commission, nagpamalibad sa paglunsar sg kahublagan panadlong, ang pipila ka mga kadre kag madamu nga katapuan nga mga sinserong proletaryong rebolusyonaryo nagpanindugan sa pagtib-ong sg Kahublagan Panadlong kag ginhatagan kabuhi ang panawagan sg Pungsodnon nga Pamunuan nga “Balikan ang Sandigan nga mga Prinsipyo, Tatlunon ang mga Sayop!” sadtong 1992.

Sa bulig sg pungsodnon nga pamunuan sg Partido, ang masobra na lang isa ka gatos nga regular nga Hukbo, YM kag mga AYP nga nagpanindugan para manadlong, nag-atubang sa demolisyon nga atake sg mga nagsikway o namatuk sa Kahublagan Panadlong kag sa Operation Flush Out sg US-Ramos nga Rehimen.

Ang nakaregroup nga mga kadre kag Pulang Hangaway, nagpatuman sg masalimuot nga proseso sa paglunsar sg kahublagan panadlong, samtang ginaaway

man ang malala nga disoryentasyon sg taga ka katapuan. Ginporma ang mga iskwad para sa gilayon nga pagrekober sg mga erya kag sa madasig nga pagpalapad. Nag-umpisa lamang ang mga Pulang Hangaway sa tatlo (3) ka sityo sg magkatambi nga mga barangay sa boundaries sg Occidental kg Oriental Negros.

Sa proseso sg pagpanadlong, madamu pa sg mga kaupod ang nagkalapugday kag nagpahuway bangud sg ila disoryentasyon – lunsay-militar nga panan-awan, pagpangindi sa matutom nga hilikuton masa, tamad sa mga teoritikal nga pagtuon kag iban pa. Apang sa kabilugan nangin madinalag-on ang ginlunsar nga kahublagan panadlong halin 1994 tubtob 2004. Natib-ong liwat ang pagpamuno sg sahing mamumugon paagi sa Partido Komunista. Nangin aktibo liwat ang mga rebolusyonaryong organisasyon masa sa pag-organisa sg BHB. Narekober ang signipikalang kadamuon sg baseng masa sa kaumhan.

Nakaangkon sg panibag-ong kapagsik ang BHB sa liwat nga pagsulong sg pungsodnon demokratikong rebolusyon paagi sa pangmalawigon nga inaway banwa. Liwat sini ginbalikan ang linya sa estratehikong depensiba nga amo ang “dasok kag lapanagon nga gerilyang pagpakig-away base sa nagadalum kg nagalapad nga baseng masa.” Napundar liwat ang mga larangan gerilya sa mga mayor nga dibisyon sg Isla – Central Negros, Southwest, Southeast kg Norte. Nalunsar ang mga kalkulado kag koordinado nga taktikal nga opensiba nga nagpaalarna sa reaksyonaryong estado kg AFP.

Pagpalig-on sa Hukbo kag ang Pag-abanse para Abuton ang Estratehikong Pagkapatas.

Sumugod 2000, labi pa nga nag-atubang ang Hukbo sa lain-lain nga Operation Plan sg reaksyonaryong estado. Ara ang O'Plan Makabayan ni Estrada, O'Plan Gordian knot kag O'Plan Bantay Laya ni Gloria Arroyo kag ang karon nga O'Plan Bayanihan ni P-noy. Gingamitan sg 303rd Bgde ang BHB sg O'Plan Kingfisher kag "cutting the wedge" nga estratehiya sa tuyo nga pahinaon kun indi man wasakon ang BHB kag rebolusyonaryong paghimakas sa Isla.

Matuod nga nangin masalimuot, mabudlay kag puno sg sakripisyo ang pagpundar sg Bag-ong Hukbo sg Banwa tubtob sa pagpalambo sini. Apang bangud man sini, labi nga nangin resolbado kag pursigido ang pumuluyo nga suportahan, padakuon kg palig-unon ang BHB nga amo ang ila tigpangapin sa ila kabuhi kg pangabuhian.

Sa sulod sg 3 ka tuig nga pagpatuman sg OPlan Bayanihan halin sg 2010, gingamit sg kaaway ang "win-hold-win" nga istratehiya. Gindesyong ini sg 3rd Infantry Division mismo kag ginaoperationalize sg 303rd Bgde kag tagsa ka battalion idalum sini. Katulad sg mga nagliligad nga desinyo sg kaaway, wala gihapon nabag-o ang operational design nila nga sustained, intel-driven operations kg Civil Military Operation (CMO). May 2 ka battalion nga ginabutang sa prioridad nila nga larangan kg may isa ka batalyon sa kada larangan. Ginaestimate nga nagalab-ot sa 10,000-12,000 ka tropa sg kaaway (lakip na ang CAFGU) ang nahamtang sa mga larangan gerilya, wala pa labot ang ila mga force multipliers nga

nahimong paramilitar katulad sg CVO, BPAT kag Bantay Bayan.

Sa isa ka prayoridad nga larangan nagaoperate ang kaaway sulod sa 10 x 10 o 10 x 20 kilometros nga radyus, nga may 200 o masobra pa nga nagabulos-bulos nga pwersa nga nagalawig sa tag-lima tubtob 1 ka semana.

Ang Civil Military Operation sini ginapatigayon sg ila CMO Battalion nga nagagamit sg mga Peace and Development Teams (PDTs) nga wala sg huya nagalapas sa Laye sg International Humanitarian Law (IHL) kag sa Comprehensive Agreement on Respect for Human Rights and International Humanitarian Law (CARHRIHL) paagi sa pagtenir sa mga pamalay, Barangay Hall, Health Centers, Day Care Centers kg mga merkado. Ginahimo nila nga taming ang pumuluyo.

Tuman naman ka bahol ang ginapadayaw sg AFP kag ni Maranon nga madamuan nga pagsurender sg mga Pulang Hukbo. Kadam-an sini ila ginpangpwersa kun indi man gintiplang. May ara man nga mga dekada 90 o temprano nga bahin sg 2000 pa nga nagpalahuway nga ila ginapilit pasurenderon para lang may ipropaganda kag para makakwarta, ilabe na ang mga opisyal.

Sa pihak sini tanan, nalab-ot na sg BHB ang pagtukod sg mga larangan gerilya nga may tagsa ka gamay nga kompaniya tubtob lubos nga kompaniya. Kag padayon pa nagapalapad sg dugang nga mga larangan gerilya paagi sa yunit sg BHB upod ang mga katapu sg Sanga sg Partido sa Lokalidad (SPL). Nabalikan na ang mga erya nga nabayaan sadtong panahon sg paglihis. Bisan

daku ang kabudlayan apang napangibabawan ini bangud sg mainit nga pagbaton sg masa. Kag may mga erya man nga sadto wala nalab-ot sg BHB nga karon naabot na. Epektibo nga nagamit ang prinsipyo sg “trade space for time”, samtang ginamentinar ang opensibang postura sg Hukbo.

Nagalab-ot sa gatos ka libo nga pumuluyo ang nakabenepisyo sa pagsulong sg rebolusyon agraryo sa Negros sa lain-lain nga porma sg aksyon kg paghimakas. Talupangdon ang pagdamu

sg land cultivation areas (LCAs) bilang sabat sg mangunguma kg mamumugon sa uma sa gutom nga ila ginasuprer kag sa pagka-inutil sg Department of Agrarian Reform (DAR) sa pagpatuman sg matuod nga repormang agraryo. Lapnagon ang aksyon sg masang mangunguma sa pagpataas presyo sg ila mga produkto, pagdemanda sa



pagpataas sweldo kag pagpamatuk sa lain-lain nga programa sg gobyerno nga nagaagaw sa dutang pangabuhian katulad sg komersyal nga reporestasyon, mina, agrikultural nga plantasyon sg saging, pinya, palm oil kg rubber tree. Kadungan man sini nga mga kampanya kg paghulag sg masa ang pagpamatuk sg mangunguma sa terorismo sg estado. Hugot nga nakaangot ang kontra-pyudal nga paghimakas sg mangunguma sa kontra-imperyalismo kg kontra-pasismo nga paghimakas masa.

Kada tuig nagadaku kag nagadalum ang baseng masa sg rebolusyonaryong kahublagan. May signipikante na nga isip sg LAM sa madamu nga baryo. Kag sa indi madugay, tukuron na ang municipal nga lebel sg LAM diri sa Isla sg Negros. Ginapamunuan ini sg nagadaku nga isip sg SPL kg katapu kag kadre sg Partido. Halin sg 2012 tuftob 2013, nagdaku ang isip sg katapuan sg Partido sa masobra isa ka libo (1,000). Signipikante ini nga kontribusyon sg Isla para sa 250,000 nga katapuan sg Partido nga abuton para sa paglab-ot sg estratehikong pagkapatas.

May pila ka kompaniya na sg BHB sa Isla sg Negros nga ginasuportahan sg masobra sa duha (2) ka batalyon sg yunit milisya kg yunit pangdepensa sa baryo, nga indi lang katimbang sg regular nga Hukbo sa paglunsar sg mga taktikal nga opensiba, kundi pati na sa pag-organisa, propaganda kag sa pagpalapad sg baseng masa.

Bisan pa nagapadayaw ang AFP nga ang pwera sg NPA sa Negros isa na ka “spent force”, sa kabilugan, nakalab-ot sa 106 ka taktikal nga opensiba ang natigayon sg BHB sulod sg 3 ka tuig kag nakakumpiska sg mga lain-lain kalibre sg armas nga sarang makapaarmas sa isa ka kompaniya sg Hukbo kg YM. Nakatuga naman ini sg masobra 200 ka kaaway nga napatay kg madamu nga mga pilason kag nakasilot sa mga higanteng minahan nga nagahalit sa pangabuhian sg mangunguma kg sa palibot. Samtang, nag-atubang naman ang BHB sg kapin sa 39 ka depensibang aksyon nga nag-utas sa kabuhi sg pipila ka kaupod.



Bangud sg Programa sg US-Phoy nga rehimen nga Public Private Partnership kg sg Negros First Agenda sg asyendero nga Gobernador Alfredo Maranon, Jr., nagadamu ang mangunguma, mangingisda kag imol nga taga-syudad ang ginademolish kag nagakawad-an sg pangabuhian para himuon nga pastuhan sg baka kg karnero, patamnan pinya kag saging nga pang-eksport, palm tree, rubber

tree, BT corn, malls sg mga dumuluong kapitalista kg DKB, beach kag spring resorts, mining kag iban pa.

Mas malala pa, wala sg klaro nga alternatibo ang gobyerno para sa mamumugon sa kampo kag mangunguma paano solbaron ang krisis nga atubangon sg industriya sg kalamay nga pat-ud iguon sg pagnubo sa 0-5% tariffs sg imported nga kalamay bangud sg implementasyon sg ASEAN Free Trade Agreement (AFTA).



Sa pagsingki sg banggianay sg mga sahi – sg agalon mayduta-asyendero kg mangunguma kag mamumugon sa uma, sg dalagkung komprador burgesya kag dumuluong nga kapitalista batuk sa mamumugon kg petiburgesya, labi pa nga napamatud-an ang kasignipikante sg Hukbo sa pagpukaw, pag-organisa kag pagpahulag sa malapad nga mangunguma kg mamumugonagud depensahan ang ila pangabuhian kag kinamatarung nga mabuhi nga malinong kag matawhay. **AP**

PASINGKION ANG TAKTIKAL NGA OPENSIBA! LABI NGA IPASULONG ANG INAWAY BANWA SA MAS MATAAS NGA LEBEL!

Apolinario Gatmaitan Command, NPA, Negros Island

Sa okasyon sg ika-45 ka tuig nga Anibersaryo sg New People's Army (NPA), lubos ginapanginbulahan ang maisog kg isganang mga Opisyal kg Hangaway sg NPA! Subongman, ginahatagan naton sg pagsaludo ang mga kaupod nga naghalad sg ila bilidhon nga kabuhi para sa pagpasulong sg armadong paghimakas sa Isla.

Sang gintukod ang NPA sadtong Marso 29, 1969, may kapin lamang ini sa 65 ka hangaway, 35 ka armas nga may 9 ka high-powered rifles nga naghalin sa daan nga Hukbong Mapagpalaya ng Bayan (HMB). Apang bangud sg husto nga absolutong pagpamuno sg Partido Komunista sg Pilipinas (PKP) kag sa pagsikway sa kaisipan sg rebeldeng-lagawan sg Taruc-Sumulong nga gangster clique kg sg rebisyunistang Lava, 45 ka tuig ang makaligad, nakaangkon na ang NPA sg kritikal nga kadakuon nga sarang makapatay-og sa pundasyon sg reaksyonaryong estado.

Humalin pa sg 2007 idalum sg Oplan Bantay Laya sg anay US-GMA nga rehimen tubtob subong, ang Negros ginhimo nga isa sa mga prayoridad o laboratoryo sg karon nga Oplan Bayanihan sg US-Aquino nga Rehimen 2, sa tuyo nga papason o pahinaon ang rebolusyonaryong kahublagan nga ginalunsar sg CPP-NPA-NDF.

Pila na ka bilyon ka pesos ang ginagasto sg reaksyonaryong estado diri sa Isla para sa ini nga katuyuan. Pila na ka mga ginaalegar lideres sg hublag ang ginpangdakop kg ginpangpreso. Kag bisan pa sa "cutting the wedge" nga estratehiya sg AFP sa Isla, ukon ang pag-utod sg angot sg Negros sa lain-lain nga mga isla sg Visayas, nagpabilin malig-on kag padayon nagadaku ang pwera sg NPA sa Negros.

Bisan pa sg todo-larga nga military operation sa kaumhan kg sa kasyudaran sining una nga quarto sg 2014, para tapuson ang ila 6-months extension sa Isla agud makasaylo na sila sg pokus sa iban nga isla sg Visayas, serye sg mga taktikal nga opensiba ang natigayon sg BHB sa tanan nga larangan gerilya sg Negros.

Sulod lang sg 3 ka bulan sini nga tuig, ginsilutan paagi sa pagsunog sg bodega kg traktora kag pagdis-arma sa mga abusador nila nga mga gwardya, ang despotikong agalon mayduta nga



sanday Pablito “Jin” kg John Paul Sola, kun diin nakarekober ang mga NPA sg pila ka armas. Nasilutan man sg kamatayon ang pipila ka mga masupog nga kontra-hublag nga mga katapu sg CAFGU sa Isabela kg Ilog kg ang intelligence asset (surrenderee) sg 11th IB sa Banwa sg Binalbagan kag pagharass sa detachment sg 62nd IB sa Calatrava. Madamu man ang mga ginpangwarningan kg gindis-armahan bangud sg ila kontra-hublag nga aktibidad kg mga malain nga elemento.

Samtang, padayon ang konsolidasyon sg Partido kg Hukbo. Nakalunsar sg serye sg paghanas sa Batakanng Kurso Politiko-Militar (BKPM), pagtuon sg Intermedyang Kurso sg Partido (IKP), Konperensya sg PKM kg YM, Plenum sg mga Komite sa Larangan, nakapasumpa sg mga bag-ong rekrut sa Hukbo kag Partido kag nakahiwat sg kasal sg mga kaupod.

Epektibo man nakapalapad sg erya ang mga yunit sg NPA. Nangin tuman kainit ang pagbaton sg mga nagahulat nga masa sa pag-abot sg Hukbo sa ila lugar. Ang pagpokus sg kaaway sa mga ispesipikong lugar naghatag sg ligwa sa Hukbo agud lab-uton ang mga erya nga relatibo mahuyang ang kaaway. Natigayon ini bangud sg pagtimbang sg mga katapu sg Party Branch sa Lokalidad.

Tayuyon man ang paghimakas sg masa sa pag-angkon sg mas mataas nga sweldo, benepisyo, mataas nga presyo sg ila mga produkto, alayon kg dagyaw, kultibasyon sa bakante nga mga duta kg pagdependa sa ila dutang pangabuhian.

Nagakaangay lamang kondenahon ang desperado nga tikang sg AFP / PNP para

pahipuson ang mga nagahimakas sa legal demokratikong pamaagi paagi sa pagpasaka sg iscripted nga mga kaso kg pagpreso, katulad sg natabo sa Secretary-General sg Bayan-Negros nga si Mr. Christian Tuayon. Ngaa bala ang mga indi-armado ang inyo ginainitan? Ngaa indi ang mga NPA sa kabukiran nga handa mag-atubang sa pasistang armadong pwersa sg reaksyonaryo ang inyo dakpon kg atubangon?

Ilusyon ang ginasiling sg AFP kg sg Malacanang nga magahuyang ang hublag sa pagkadakop sa mag-asawang Tiamson. Imbes magpakahambog ang gobyerno sa pagdakop kay Kaupod Wilma kg Benito, mas palibugan sini ang pagbalik sa lamesa agud ipadayon ang nauntat nga Peacetalks sa tunga sg GPh kg NDFP. Kun matuod nga sinsero si Pnoy nga angkunon ang kalinong kag kauswagan, dapat sini pamatian ang singgitan sg madamu nga Pilipino para sa peacetalks kg ipatuman ang mga nakasugtan angot sini.

Ilunsar ang madamuan nga paghimakas masa kg taktikal nga opensiba! Labi nga pasingkion ang inaway banwa sa Isla! Nagahulat ang malapad nga kaumhan kag kabukiran para sa pagpatapu sg pumuluyo sa armadong paghimakas!

Silutan ang mga kriminal kag berdugong AFP nga tiglapas sa tawhanong kinamatarung sg pumuluyo kg mga despotikong agalon mayduta-komprador burgesya!

Mag-upod sa NPA kg lab-uton ang matuod nga hustisya sosyal, kalinong kag kauswagan!**AP**

45 KA TUIG SG BHB, PADAYON NAGABASKOG KAG NAGALIG-ON SA PAGSULONG SG INAWAY BANWA

*Armando Sumayang Jr. Command
Southwest Negros Guerilla Front*

M ainit nga pagpanginbulahan sa mga hangaway kg opisyal sa pagsaulog sa ika-45 ka tuig nga pagsukat sg Bag-ong Hangaway sg Banwa (BHB)! Madamu sg rason para malipayon nga iselebrar sg BHB, Partido Komunista sg Pilipinas (PKP) nga amo ang absolutong nagapamuno sa BHB, kag sg pumuluyong pigos kg ginahimuslan ini nga anibersaryo.

45 na ka tuig nga wala'y kakapoy kg wala'y kataka nga nagasulong sg armadong paghimakas ang BHB sa bilog pungsod. 45 na ka tuig nga padayon ini nagaangkon sg kadalag-an para sa pumuluyo, sa pihak sg 45 naman ka tuig nga pagtinguha sg reaksyonaryong rehimen gikan kay Marcos padulong sa karon nga rehimen ni Noynoy Aquino nga wasakon ang CPP-NPA-NDF. Apesar sg gamay, mahuyang kg tuman ka budlay, kulang sa rekurso kag atrasado nga kagamitan sa pagpakig-away, nagsustenir kag nagpursige ang NPA. Bangud sg husto nga linya sa ideolohiya, politika kg organisasyon, ang tanan nga limitasyon sg gamay nga tropa

sg NPA, napangibabawan kag karon nagabaskog kg nagabakod.

Napagkit sa maragtas sg rebolusyonaryong kahublagan ang papel sg Southwest Negros o CHICKS Area (Cauayan,

Hinobaan, Ilog, Candoni,

Kabankalan kg

Sipalay) para sa

pagpanugod kag

pagpalapnag sg

armadong

paghimakas sa Isla

sg Negros paagi sa

paghanas kg

pagpatuhaw sg mga

kadre kg hangaway

nga nagpalapnag sg

rebolusyonaryong

paghimakas sa bilog

nga Isla sg Negros sadtong dekada 70. Diri

ginpamatud-an ang ikasarang sg mga Pulang

Hangaway kg rebolusyonaryong masa sa pag-

atubang sa masingki nga pasistang atake sg

Total War Policy (Low Intensity Conflict) sg

Cory Aquino nga rehimen paagi sa bantugon

nga O'Plan Thunderbolt nga may bantugon

nga chanting "Payt Bisul (NPA), Kontra Humay

(AFP)!"

Sa liwat nga pagpanadlong sg PKP kg

NPA, kag sa pagpasulod sa halintang sg

estrategikong pagkapatas sg inaway banwa,



labi pa nga nagasingki ang pagpakig-away sg pumuluyo ilabe na agud pangapinan ang dutang pangabuhian batuk sa mga higanteng minahan kag offshore mining sg Maricalum Mining, Philex, Vulcan, Selenga kg madamu pa, batuk sa kapitalistang plantasyon sg oil palm, rubber tree, saging kag batuk sa pagpang-agaw duta sg despotikong agalon mayduta nga pamiya ni Pablito kg John Paul Sola gamit ang mga mersenaryong 47th IB kg RMG kag mga bayaran nga traidor nga suluguon sg mga Alvarez nga RPA-ABB.

Sa ini lang nga tuig, madinalag-on nga natigayon sg mga operatiba sg BHB sa idalum sg Armando Sumayang, Jr. Command ang pagsunog sa bodega kg traktora kg pagdis—arma sa mga gwardya sg despotikong si Pablito Sola kg sg iya bata nga si John Paul Sola. Kabahin lamang ini sa pagsilot sa ini nga pamilya bangud sg grabe nga kalakasan batuk sa pumuluyo sg Brgys. Camansi kg Tampalon, Kabankalan City. Sa hurubaton pa sg mga tigulang, “kun puno na ang gantangan, dapat na ini nga kalison”.

Pila sa ila krimen nga nakomiter batuk sa pumuluyo amo ang multiple arson, multiple murder, harassment, grave threats, landgrabbing, paghalit sa mga tanom sg pumuluyo, pagpatay sg karabaw sg pumuluyo, di-makatarungan nga pagpatrabaho, kag iban pa.

Si Pablo Sola ang nag-agaw sg duta nga sadto ginhawan ni Silvestre Gatillas, amay ni Mansueto Gatillas sadtong antes ang WWII. Sang malimpyo na ang lasang nga pwede na tamnan sg tubo kg iban pa nga tanom, ginpasakaan kaso kg ginpadal-an ni Pablo Sola sg soldado si Bestre Gatillas para

presohon. Nagpadayon ini sg pila ka beses hasta sg dekada 60-70. Sang ini nga panahon may poder sa politika si Pablo Sola bilang Mayor sg Kabankalan City. Sang pagbaskog sg kahublagan, nagbaskog man ang pagpamatuk sg pumuluyo sa kalakasan ni Sola. Sa iya pagkadespotiko, iya ginpatatay ang mga nakilala niya nga lider masa sadto. Tuman ka makasaligni ang iya pagpamatay – ginapaguyod sa kabayo kg jeep ang lawas sg tawo nga ila ginapatay kag ginasunog. Bangud sini, ginsilutan sg Rebolusyonaryong Korte sg Pumuluyo si Pablo Sola. Nabunutan sg tunok ang dughan sg pumuluyo ilabe na ang pamilya sg ila mga nabiktima.

Karon amo man sini ang ginahimo ni Pablito kag John Paul. Seguro nagasalig sila nga ara ang 47th IB kg RMG, amo nga daw mga ido-buang sila nga nagapanghalit sa pumuluyo. Indi kamo malipat nga ang pumuluyo wala pa nalipat sa krimen ni Pablo. Gani, sa madali o madugay malab-ot gid sila sg malaba nga kamot sg rebolusyonaryong hustisya.

Ang pagsilot kay Alfredo Lucero, intelligence asset, abusador, manug-agaw duta kg extortionist kg Ricky Camacho nga isa ka active CAFGU, nagapakita nga seryoso ang NPA sa pagsilot sa mga napamatud-an nga masupog nga mga intelligence agent sg AFP kg may krimen sa pumuluyo. Pasulit-sulit ang pagwarning sg NPA sa mga ginasuspetsahan nga utok sg pagpanghold-up. Si Ricky isa ka hold-upper nga ginaproteksyonan sg iya pagka-CAFGU kag ginayuyan sg isa man ka katapu sg Phil. Army.

Apesar sg mga US-inspired psywar kg combat operations, surrender hypes, gamit ang mga “persona non-grata” nga sanday Rodolfo “Bliss” Alemen, Jr. kag Elizalde “Bong” Martizano kag black propaganda sg US-Aquino nga rehimen kg AFP, padayon nga magaagum sg kadalag-an ang pumuluyo kg mag-abanse padulong sa estratehikong pagkapatas.

Indi mapunggan sg pagkadakop sa sin-o man nga mga lideres sg rebolusyonaryong kahublagan katulad sg mga kaupod nga mag-asawang Tiamson kg iban pa, ang pagsulong sg rebolusyon samtang nagapadayon ang

mapiguson kg mahimuslanon nga sistemang mala-kolonyal kg mala-pyudal. Sa baylo, mangin inspirasyon pa ini sg mga Pulang Hangaway, Partido kag rebolusyonaryong masa para padasigon ang pagwasak sa ini nga sistema kag konsolidahon ang pulitikal nga gahum sg sahing proletaryado! Indi mga lideres ang nagahimo sg kasaysayan, kundi ang masa kag masa gid lamang ang nagatuga sg kasaysayan. Makatarungan ang magrebolusyon!

Mabuhay ang Bag-ong Hangaway sg Banwa, Partido kg masa! **AP**

Magkonsolida, magpalapad kag dugang nga kaisog sa pagbato sa liwat nga pagpaslaw sg Oplan Bayanihan sg AFP kag US-Pnoy nga rehimen!

Leonardo Panaligan Command, NPA Central Negros Guerilla Front

Sgnipikante kag madinalag-on nga ginsaulog naton ang ika-45 ka tuig nga Anibersaryo sg New People’s Army karon nga adlaw Marso 29, 2014 gikan sa liwat nga pagtukod sini sadtong Marso 29 1969.

Sa kada tuig mas labi naton ginapalig-on ang aton pagtib-ong sa mga sandigan nga prinsipyo, programa, patakaran, kag linya sandig sa sinsero kag hugot nga pagsunod sa Konstitusyon sg aton Partido. Ang Marxismo-Leninismo-Maoismo bilang unibersal nga ubay sa ideolohiya nga nagserbi iwag sa aton pagsulong kag pag-uswag sa tanan nga bahin sa sulod sa masobra apat ka dekada nga pag-atubang kag pagpangibabaw sa obhetibo kag suhetibong kondisyon nga nagkurit sg aton mga kadalag-an.

Daku nga kadalag-an ang patay-buhi kag pursigido naton nga paghimakas sg maglunsar ang aton partido sang ikaduha nga kahublagan panadlong sadtong temprano nga bahin sg dekada ’90 nga nag-ani man sg aton determinasyon nga mapatuman kag mapadaug ang demokratikong rebolusyon sg banwa paagi sa pangmalawigong inaway banwa sa patag sg pagtukod sg baseng masa, armadong paghimakas kg agraryong rebolusyon.

Tuig 2009 liwat nga nagpanawagan ang Partido nga magdungan sa pagmartsa ang bug-os nga rebolusyonaryong pwersa sa pagpamuno sg PKP nga i-angat ang aton pagsulong nga abuton ang estratehikong pagkapatas gikan sa estratehikong depensiba matapos ang pulo ka tuig. Liwat naman kita nag-ani sg mga kongkretong kadalag-an nga nagmarka naman sg masanag nga palaabuton nga nag-inspirar sa bug-os nga rebolusyonaryong kahublagan sa pagkapatas.

Sa ika-45 ka tuig nga pagsukat sg aton Bag-ong Hangaway sg Banwa ginapasidunggan naton ang aton mga rebolusyonaryong martir nga naghalad sg ila ikasarang, kina-alam kag kabuhi nga mabutang sa unahan ang interes sg rebolusyon nga nagserbe inspirasyon kag aspirasyon sg aton pagsulong nga malab-ot ang tunay nga kahilwayan kag demokrasya.

Nagapasalamat man kita sa aton mga kadre kag bug-os nga katapu-an sg Partido upod sa aton mga isganan nga mga opisyal, mga katapu-an sg Bag-ong Hangaway sg Banwa, mga yunit milisya, mga rebolusyonaryong masa kag abyan nga nag-amot nga maangkon ang ini nga mga kadalag-an sa sulod lamang sa isa ka tuig (2013). Sa pihak sg todo larga nga kampanyang militar nga Oplan Bayanihan sg US-Pnoy nga rehimen upod sa mersenaryo kag pasistang AFP/PNP kag para-militar, komprehensibo kita nga nagbato kag nakapangibabaw.

Sa sulod sg isa ka tuig mas labi pa nga nakakonsolida ang aton katapu-an sg Partido paagi sa mga pagtu-on sg mga kurso sg Partido. Labi man nga nagdaku sg 10% ang mga katapu-an. Madamo man sg mga kadre nga napatuhaw gikan sa hanay sg mga intelektwal kag kabataang estudyante nga lubos panahon nga nagpasakop sa armadong paghimakas kag iban pa nga porma kag linya sg mga hilikuton sg Partido. Halos kusog platun ang nadugang sa kusog sg BHB kag madamo man sg kadre militar ang napatuhaw. Nakalunsar man sg masobra 20 ka taktikal nga opensiba sa nagkalain-lain nga taktika kag teknika nga nakakumpiska sg malapit 30 ka mga armas kag lohistika militar nga sarang mapa-armas sa kusog platun nga narekruta. Nagdaku man ang kusog sg yunit milisya nga handa magpartisipar sa igalunsar nga mga taktikal nga opensiba sg BHB batok sa AFP, PNP, RPA, Para-militar, goons kag iban pa nga kriminal kag kontra-rebolusyon nga elemento.

Maisog nga gin-atubang sg mga mangunguma sa sakop sg LPC ang pyudal nga pagpanghimulos sg mga agalon mayduta paagi sa pagduso sg 2 ka serye sg kontra-pyudal nga paghimakas sa porma sg dayalogo batuk kay Vice-Mayor Ernesto Reyes kag Juanita Albino sa hambalanon sg pagpataas sg suhulan kag pagpamatok sa liwat nga pagpang-agaw sg duta nga pangabuhi-an sg mga mangunguma, tanan sa Guihulngan Oriental Negros sadtong Abril 2013 kag Agosto 2013.

Kapin sa 700 ang nakabenepisyo. Malapit 30 mil man ka mga pumuluyo ang namobilisa sa ginpatigayon nga mga kontra-pasista nga linya sg paghimakas nga ara man ang ubos-kusog nga pagsuporta sg mga abyan, patriotiko kag demokratikong pwersa sa mga rally-protesta batok sa militarisasyon nga masami nagabayolar sa tawhanon nga kinamatarung sg mga pumuluyo sa

kaumhan nga ginakomiter sg pasistang militar. Isa na diri nga panghitabo nga nangin bangungot sa AFP ang natabo nga mis-encounter sa Brgy. Pitogo La Libertad, Negros Oriental sa tunga sa Bravo Coy sg 11th IB PA kag panatikong Greenan nga gin-organisa kag ginpaarmasan man sg pamilyang Sy-Limkaichong nga nag-utas sg kabuhi sg inosenteng sibilyan nga si Randy Garsola sg Sitio Tambo, Amontay Binalbagan kag 9 ka AFP kag isa ka CAFGU nga hungod nila ini nga ginhimutig sa publiko. Ini natabo sadtong Nobyembre 24, 2013 mga alas-5 sg hapon sa nasambit nga lugar.

Ang pagpangdakop kag pagpaprisko paagi sa mga himo-himo nga mga kaso sa malapit 30 ka inosente nga mangunguma kag sibilyan sa Barangay San Agustin sa Isabela Negros Occidental kag Barangay Tacpao kag Linantuyan sa Negros Oriental. Ini sila ginpasibangdan sg pasistang militar nga mga katapu sa New People's Army kag tubtob subong iban sa ila ara pa sa prisohan. Sa kamatuoran, ang ila ginalunsar nga peace and development paagi sa ila CMO battalion subong sa binukid sa Central Negros labi nga naghatag sg perwesyo sa pumuluyo bangud mas labi nga nagduging ang illegal drugs, illegal gambling, kinawatay, pinatyanay, hold-up kag iban pang kriminalidad bangud sila man lang mismo nga ara sa otoridad kag local executives ang nagapamuno sg sini nga mga illegal nga aktibidad.

Sa Guihulngan lang mismo nga ara ang presensya sa CMO battalion, mas ang AFP man ang nagapundar sg mga bulangan upod kay Mayor Guido Reyes sg Guihulngan isa na diri ang bulangan sa Barangay Humay-humay kag iban pa nga mga baryo. Ang AFP man ang nagaorganisa sa mga mahuyang nga mga elemento sa pagpangawat sg manok nga inugbulang upod na ang pagpanghold-up sa Barangay Buenavista sa mga benepisyaryo sg 4Ps. Ang katapu-an sg Bravo Coy sg 11th IB PA sa Barangay Buenavista, Guihulngan isa sa mga nagabakal sg dalagku nga bolto sg shabu paagi kay Sgt. Tacu nga isa ka regular military driver sg 11th IB PA nga amo nagabakal/nagakuha sa isa ka suplayer sg shabu gikan sa San Carlos Negros Occidental. Bisan ang pagpatay kay City Counselor Cyrus Fat sg Guihulngan nagpabilin nga wala sg kasolbaran bangud ara mismo sa AFP ang may kahimu-an sini. Sa paghatag lead sa imbigtasyon tawgon lang sg LPC nga sila Bravo and Juliet ang may kahimu-an sini nga pagpatay. Sa amo sini nga kahimtangan wala na sg solo nga saligan ang pumuluyo sa Central Negros kundi sa NPA na gid lang.

Ang baseng masa labi nga naglig-on, nakonsolida, nagdalom kag naglapad. Masobra 2000 ang nadugang sa mga katapu-an sa rebolusyonaryong organisasyong masa gikan sa dugang nga masobra 30 ka baryos. Naglab-ot sa 15% ang naglapad kag pagdaku sg baseng masa. Ang ini nga mga kadalag-an nagapakita lang sa pagkapaslaw sa Oplan Bayanihan sg AFP kag US-PNoy nga rehimen sa Central Negros.

Ang malaparan nga diskontento sa pumuluyo sa sistemang mala-pyudal kag mala-kolonyal sa sakop sa larangan gerilya nagapakita sg masanag nga basehan sa paglab-ot sa estratehikong pagkapatas padulong sa halintang sg Sosyalismo.

Ginapanawagan sa bug-os nga rebolusyonaryong hanay nga magkonsolida, magpalapad kag dugang kaisog sa pagbato sa liwat nga pagpaslaw sa Oplan Bayanihan!

MABUHAY ANG PKP! MABUHAY ANG BHB! MABUHAY ANG INAWAY BANWA!
MABUHAY ANG MASA!

MABUHAY ANG IKA-45 NGA ANIBERSARYO SA NEW PEOPLE'S ARMY! **AP**

NDF NAGAPANGINBULAHAN SA 45 KA TUIG SG NPA, NAGAHANGKAT SA GOBYERNO SA PAGPADAYON SG PEACETALKS

Frank Fernandez, NDF-Negros Island

Malipayon nga nagapanginbulahan ang National Democratic Front (NDF) - Negros sa mga Hangaway kg Opisyal sg New People's Army (NPA) sa ila ika-45 ka tuig nga Anibersaryo!

Humalin sg makasaysayan nga natukod ang NPA sadtong Marso 29, 1969, 45 na ka tuig ang nagligad, nakaangkon ini sg mga indi matupungan nga kadalag-an kag kusog nga sarang makapatay-og sa pundasyon sg reaksyonaryong estado sg imperyalismong Estados Unidos, pyudalismo kg burukrata kapitalismo. Nakaangkon ang pumuluyo sg mabakod nga instrumento paagi sa paglunsar sg armadong paghimakas nga tukuron ang demokratikong gobyerno sa kaumhan gikan sa kaumhan padulong sa kasyudaran. Haligi ini sg estado sg pumuluyo para depensahan ang interes sg pumuluyong Pilipino.

Ang NPA nga ginabug-os sg mga pinakamaayo nga mga anak sg mangunguma, mamumgon, petiburgsesya, pungsodnon nga burgesya kg bisan sg mga agalon mayduta kg dalagkung komprador burgesya nga

nagsikway sg ila sahi. Ini ang tigpangapin sg mangunguma sa ila kinamatarung sa duta batuk sa nanari-sari nga programa kg polisiya sg reaksyonaryong estado katulad sg Negros First Agenda sg agalon mayduta nga gobernador Maranon. Nga paagi sini nga programa, nagakahublasan ang gobyerno bilang manug-agaw duta sg mangunguma kg ido-ido gid sg mga agalon mayduta kg kapitalistang inbestor sa tubo, pinya, oil palm, rubber tree kg pastuhan.

Ang konsabohay sg Department of Agrarian Reform (DAR), Provincial Government kg Regional Public Safety Manuever Battalion (RPSMB) agud piguson ang mga mangunguma sa Had. Ilimnan, Murcia, nagapakita lamang sg kainutil kg kapintas sg estado sa interes kg demanda sg mangunguma sa pag-angkon sg duta nga pangabuhian. Ang pagpabaya sg gobyerno, AFP, PNP sa reklamo sg pumuluyo sa Brgy. Camansi, Kabankalan City batuk sa pagpanghalit ni Pablito kg John Paul Sola, nagapamatuod lamang sa pagkatuta sini nga mga institusyon sa kapritso kag kadaluk sg mga despotikong agalon mayduta.

Gani, wala na sg iban pa nga alternatiba ang masang mangunguma nga ginagutom kundi ang magkadto sa kadalanan kg ang iban mag-uyat sg armas agud isinggitan ang hustisya sosyal. "Bugas-bugas, indi armas!" Ini ang singgitan sg pumuluyo nga ginagutom.

Hangkat ini nga sitwasyon sg mangunguma dira sa institusyon sg simbahan, ilabe na sa kaparian sg Katolikong Simbahan. Hatagan ninyo sg kabuhi ang panawagan ni Pope Francis nga dapat magpangabuhi kamo upod sa masang anakbalhas, pamatukan kg isikway ang mga kagarukan sa inyo hanay kg sa hanay sg gobyerno. Panahon na nga inyo liwat balikan ang sadto progresibong panindugan sg Simbahan nga nagatib-ong sa interes sg masang pumuluyo, ilabe na sg mangunguma kg mamumugon. Mangabuhi kamo upod sa masa, "maghigko sg inyo mga kamot" kag indi sa sulod sg inyo komportableng kombento.

Ginakondenar sg NDF-Negros ang illegal nga pag-aresto sa mga Kaupod Wilma kg Benito Tiamson nga mga holders sg JASIG kg lima (5) sini ka kaupdanan. Ginapakita lamang sg pasistang estado ang pagkatuso kag indi sinsero sa peacetalks. Kun nakaya sg Aquino nga rehimen nga isurveillance kg dakpon ang mga lider sg rebolusyonaryong hublag, ngaa indi sini kaya dakpon ang berdugo nga si Jovito Palparan kg diri sa Negros ang murderer nga si Ayalin?

Agud ipakita sg US-Aquino nga Rehimen 2 ang sinseridad sa pag-angkon sg kalinong, katulad sg ginapadayaw sini sa peacetalks sa MILF, dapat sini nga iresume ang peacetalks sa tunga sg GPh kg NDFP kag tumanon ang mga ginapirmahan nga mga dokumento kg



kasugtanan katulad sg CARHRIHL kag JASIG. Indi ini magpanalaw sa tunga sg nagabalingaso nga singgitan sg pumuluyo nga angkunon ang matuod nga kalinong kg demokrasya.

Isa ka insulto sa masa nga nagahimakas kag sa rebolusyonaryong hublag ang propaganda sg reaksyonaryong estado nga bangud nadakpan ang mga Kaupod nga Wilma kg Benito Tiamson, mawatak-watak na ang NPA. Base, nalipat kamo nga ang NPA nagsugod sa gamay kg mahuyang, nga bangud sg husto nga pag-uyat sg linyang masa, nagbaskog kg nagdaku ini. Ina indi lamang bangud sg pipila ka lideres o tawo, kundi, bangud sg desaysibo nga papel sg masa sa pagbag-o sg kahimtangan. Bisan pila pa man ka lideres ang madakpan, samtang nagapadayon ang obhetibong kahimtangan sa pagrebolusyon sg masa, indi malutos ang rebolusyonaryong kahublagan, indi mawasak ang NPA.

Ipursige ang pagsulong sg inaway banwa tubob sa kadalag-an! Magsuporta kg mag-upod sa armadong paghimakas nga panguna ginalunsar sg **NPA!AP**

Mga Tulungdan Sa Pag-Away

(Ginkuha gikan sa Mensahe sg Komite Sentral sg Partido Komunista sg Pilipinas sa ika-45 nga Anibersaryo sg Bag-ong Hangaway sg Banwa, Marso 29, 2014)

Iplastar naton sa malip-ot nga paagi ang mga tulungdan sa pag-away nga dapat ipatuman sang Partido Komunista sang Pilipinas, sang Bag-ong Hangaway sang Banwa, sang mga organisasyong masa, sang mga organo sang gahum pangpulitikakag sang malapad nga masa sang pumuluyo.

- 1. Isahon ang pumuluyong Pilipino sa pangkabilugan nga linya sang demokratikong rebolusyon sang banwa batuk sa imperyalismong US kag sa mga lokal nga nagaharing sahi.**

Sa pagpamuno sang sahing mamumugon kag Partido sini, dapat mag-isa ang pumuluyong Pilipino sa pangkabilugan nga linya sang bag-o nga demokratikong rebolusyon batuk sa imperyalismong US kag lokal nga nagaharing sahi sang daku nga kumprador kag agalon nga mayduta. Dapat sila nga pukawon, organisahon kag pahulagon para atubangon ang tanan nga mayor nga gilayon kag pangmalawigan nga halambalanon kag maglunsar sang tanan nga porma sang rebolusyonaryo nga paghimakas para malab-ot ang lubos nga pungsodnon nga kahilwayan kag demokrasya.

- 2. Magpursiger nga patalsikon ang ginadiriher sang US nga rehimeng Aquino kag silutan ini sa mga krimen batuk sa**

pumuluyo kag pabaskugon ang rebolusyonaryong hublag!

Dapat magpusiger ang demokratikong kahublagang masa nga patalsikon ang rehimeng US-Aquino. Kadungan sini, dapat paigtingon sang BHB ang mga taktikal nga opensiba para ipakita ang suporta sa pumuluyo kag mga pwersa nga patriyotiko nga nagatindog sa dungganon nga pagtinguha nga patalsikon ang rehimen. Dapat pursigido nga tinguhaan sang pumuluyo nga patalsikon ang rehimen sa relatibo malip-ot nga panahon sang duha ka tuig kag pungan ang pagpabilin sini sa poder paagi sa eleksyon. Dapat dugang nga magpabaskog ang kahublagang masa para sa pagaatubangon pa nga paghimakas batuk sa nagaharing sistema. Nakapabaskog ang rebolusyonaryong kahublagang masa sa paghimakas para patalsikon si Aquino paagi sa pagganyat sa abanse nga seksyon sang mga aktibista nga magpatapo sa Partido kag magserbisyo sa Bagong Hangaway sang Banwa o mag-abaga sang iban pa nga hilikuton nga rebolusyonaryo.

3. **Malig-on nga uyatan ang estratehikong linya sang malawigan nga inaway banwa, nga palibutan ang kasyudaran halin sa kaumhan.**

Ang armadong paghimakas ang pangunahon nga porma sang rebolusyonaryong paghimakas para ibagsak ang nagahari nga sistema sang daku nga kumprador kag agalon nga mayduta nga sunud-sunuran sa imperyalismong US. Dapat padayon naton nga uyatan ang estratehiko nga linya sang malawigan nga inaway banwa. Nagasanto ini sa kinaiya kag pirme nga krisis sang nagaharing sistema sang mga kumprador kag asendero. Nahimo sang Bag-ong Hangaway sang Banwa kag iban pa nga rebolusyonaryo nga pwersa nga magpreserba sang kaugalingon, huluhalingtang nga pagdaku kag magsulong sa pihak sang dalagku nga panghangkat.

4. **Ipatuman ang subong nga estratehikong plano sang pagsulong halin estratehikong dependensiba pakadto sa estratehikong pagkapatas!**

Dapat magpadayon kita sa dalan sang pagtigayon sa estratehikong plano sang pagsulong halin sa estratehikong dependensiba pakadto sa estratehiko nga pagkapatas. Para mapatuman ang plano, ara ang Partido sa bilog nga pungsod nga madalom nga nakaugat sa masang anakbalhas kag natilawan sa inaway, maisog kag hanas nga mga Pulang kumander kag hangaway. Dapat padayon nga



agawon kag uyatan sang Bagong Hangaway sang Banwa ang inisyatiba batuk sa armadong pwersa sang kaaway. Dapat siguruhon sang Partido nga ang mga abanse nga prente, subrehiyon o rehiyon makabulig sa pagpalapad o pagsulong sang mga rebolusyonaryo nga pwersa sa ibang prente, subrehiyon o rehiyon.

5. **Labi nga pauswagon ang inaway gerilya kag paigtingon ang mga taktikal nga opensiba.**

Dapat padayon nga isulong kag pauswagon ang maigting kag lapnagon nga inaway gerilya sa basehan sang nagapalapad kag nagapadalom nga baseng masa. Dapat padayon naton nga batuan ang konserbatismo, agawon kag uyatan ang inisyatiba paagi sa pagmentinar sang moda nga opensibo. Dapat hingalitan sang BHB kag tanan nga rebolusyonaryong pwersa ang tanan nga kahigayunan nga paslawon ang kaaway. Pabaludbalod naton nga ginapalapad kag ginakonsolida ang aton nga kusog.

Dapat makalunsar ang mga kumand sang BHB kag milisya sang banwa sang mga kusog-

tim tubtob kusog-kumpanya nga taktikal nga opensiba nga nagatuyo nga agawon ang mga armas kag kagamitan militar sang kaaway.

Kadungan sini, dapat kita maglunsar sang pila ka mga operasyon nga kumando nga magserbi nga matingkad nga pagpakita sang aton nga pagbaskog. Makadeploy kita sang nagapadaku nga mga yunit gerilya sa pagagaw naton sang mas madamo nga armas halin sa kaaway. Ang posibilidad sang regular nga inaway nga mahulag nakasandig sa kadalag-an naton sa pagpakigaway gerilya.

6. Isulong ang reporma sa duta bilang pangunahon nga kaundan sang demokratikong rebolusyon!

Dapat naton nga ipatuman ang nagakaigo kag kinahanglanon nga programa para sa reporma sa duta sa nagkalainlain nga lugar. Ang pinakakatuyuan amo nga ipatuman ang rebolusyong agraryo bilang pangunahon nga



kaundan sang demokratikong rebolusyon. Dapat naton bungkagon ang malapad nga kadutaan, ang mga nagapangagaw nga mga plantasyon kag mga pastuhan para mas malapad ang duta para sa reporma sa duta. Dapat naton waskon ang mga empresa sa pagtroso kag plantasyon kag operasyon nga pagmina nga pang-eksportbangud kabangdanan ini sang pagtiphag sang duta, mga pagbaha kag paghilo sang mga sapa.

Ginaguba sini ang agrikultura, pagpangisda kag iban pa nga porma sang pangabuhian sang pumuluyo.

7. Palaparon kag palig-unon ang baseng masa kag padamuon ang mga prenteng gerilya!

Dapat naton nga palaparon kag palig-unon ang baseng masa. Dapat naton nga padamuon ang prenteng gerilya sang pabaludbalod o sa pagtukod sang mga tim para maghanda sang mga prenteng gerilya.

Dapat naton nga tukuron ang mga organisasyong masa sang mga mamumugon, mangunguma, kababainhan, pamatan-on, bata kag mga aktibista pangkultura. Dapat tukuron

ang mga lokal nga organo sang gahum pangpulitika halin sa lebel baryo pataas. Dapat man naton nga tukuron ang mga milisya sang banwa bilang mga pulis sa baryo kag ang mga yunit sa kaugalingon nga depensa sang mga organisasyong masa. Ang mga komite nga rebolusyonaryo sa baryo o

inter-baryo dapat mag-abaga sang nagadaku nga mga hilikuton pang-estado sa balayon sang pagsulong sang pagpakigaway gerilya batuk sa kaaway.

Ang mga yunit sang hangaway sang banwa mahimo nga maglunsar sang mas madamo nga mga taktikal nga opensiba kon tigayunon sang lokal nga sanga sang Partido, sang mga organo sang gahum pangpulitika kag sang mga organisasyong masa ang mga

hilikuton nga indi pangkombat. Pat-ud ang pagluntad sang dual nga gahum pangpulitika kag sang pulu-pulo nga tereyn sang inaway, ang pumuluyo kag mga rebolusyonaryong pwersa sa mga baseng gerilya dapat magpakasampaton sa pagkumbina sang ligal kag ilegal nga mga porma sang paghimakas para pangapinan ang mga organisasyon masa kag ang mga organo sang gahum pangpulitika, ang mga pagsulong sa ekonomya pati na ang mga kadalagan sa pangkatilingban, pangkultura kag iban pa nga patag.

8. Maghanda sa labi pa nga pagpasilabot kag agresyon sang US.

Dapat naton nga kundenahon kag batuan ang nagaiging nga pagpasilabot militar sang US. Dapat naton ihanda ang pumuluyo kag ang aton nga mga pwersa batuk sa posibilidad sang isa ka gera nga agresyon sang US sa pagsulong sang inaway banwa. Dapat naton nga sakdagon ang isa ka pungsodnon nga nagahiliugyon nga prente batuk sa imperyalismo kag paigtingon ang aton nga paghimakas batuk sa mga papet kag traidor nga determinado nga ibaligya ang pungsodnon nga patrimonya, kag hatagan-kahilwayan ang mga dumuluong nga kapitalista nga wala-sablag nga magpadalagan



sang mga negosyo kag magpanag-iya sang duta, hatagan-kahilwayan ang military sang US nga liwat tukuron ang mga dumuluong nga base military sini nga suportado sang pondo sang AFP kag magpakat sang mga tropa kag pasilidad sini sa sulod sang pungsod liw-as sa pungsodnon nga soberanya kag integridad pangteritoryo.

9. Kuhaon ang suporta internasyunal para sa rebolusyong Pilipino paagi sa mga Pilipino sa gwa sang pungsod.

Dapat makig-isa kag aktibo nga magsuporta kita sa mga kasimanwa naton nga napwersa sang kaimulon nga bayaan ang pungsod kag ila nga mga pamilya para magtrabaho sa iban nga pungsod. Dapat naton sila nga buligan nga ipakigbato ang kinamatarung nila sa iban nga pungsod bangud nagaantus sila sa pagpanghimulos, diskriminasyon kag pagpamigos. Ginabugos nila ang 10 porsyento sang populasyon sang Pilipinas kag ara sa masobra 100 ka pungsod.

Dapat naton sila nga pukawon, organisahon kag pahulagon sa iban nga pungsod kag ang ila nga mga pamilya sa Pilipinas para magpartisipar sa rebolusyonaryo nga kahublagan masa.

10. Mag-amot sa paghimakas sang proletaryado kag pumuluyo batuk sa imperyalismo, para sa demokrasya kag liwat nga pagpagsik sang sosyalista nga paghimakas!

Ang Partido Komunista sang Pilipinas (PKP), ang Bag-ong Hangaway sang Banwa (BHB), ang National Democratic Front of the Philippines (NDFP) kag nagkalain-lain nga mga organisasyon masa dapat mag-amot sang masarangan nila para sa liwat nga pagpagsik kag labi nga pagpabaskog sang anti-imperyalista kag demokratiko nga hublag kag ang hublag komunista sa bilog nga kalibutan. Dapat nila nga ipabilin kag labi nga pauswagon ang napundar nila nga mga relasyon sang paghiliusa. Ang Partido kag proletaryo nga Pilipino may espesyal nga katungdanan nga sakdagon kag pauswagon ang proletaryo nga internasyunalismo katuwang sang internasyunal nga kahublagan komunista. **AP**

FEATURE

PEKE NGA REPORMANG AGRARYO SANG ESTADO NAGAPASINGKISANG PAGHIMAKAS SA DUTA SA BANWA SANG MURCIA

Ginposisyunan sang mga mamumugon sa kampo ang walo (8) ka asyenda sa Banwa sang Murcia nga nagalapad sa kapin 340.5 ektaryas nga kadutaan. Gutom kag dismayado na ang mga farmer-beneficiaries sa pagkahinay sang proseso kag pagpanginto nga ginahimo sang Department of Agrarian Reform (DAR) sa ila. Ining mga farmer beneficiaries kalabanan sang 1990's pa nagpasa sang Petition for CARP coverage sa DAR para masakop sa Comprehensive Agrarian Reform Program (CARP) ang mga asyenda nga malawig na nila ginapalamugnan. Wala labot sa mga nagposisyon sa duta madamo pa nga mga farmer-beneficiaries sa mga asyenda ang nagaprotesta kag nagareklamo sa DAR.

MURCIA, DAGWAY SG MALAPYUDAL NGA EKONOMIYA SG PUNGSOD. Ang Banwa sang Murcia, 3rd class kag agrarian municipality nga may 48,455 ektarya nga kalaparon kag may kinse (15) ka sakop nga barangays. Diri nahamtang ang malagpad nga monopolyo sa kadutaan sang dalagku nga



mga agalon mayduta pareho nanday Alfredo Montelibano, anay gobernador sang Probinsiya sang Negros Occidental, pamilya Rojas, Coscolluela, Villanueva, Arguilles, Regalado, Javellana, Velez kag iban pa. Diri man makita ang madamu nga mga mamumugon sa kampo / asyenda nga nagasuprer sa tuman ka nubo nga sweldo (may tag-P40.00/ adlaw pa), kulang sa benepisyo, madamu nga “child labor” kag kawad-on sg duta nga pangabuhian.

Ini ang kongkreto nga dagway sg, “Kapait sa katam-is sg kalamay”.

Sang gin-implementar ang R.A 6657 sang June 10, 1988 ukon

Comprehensive Agrarian Reform Program

(CARP), ang programa sang Repormang

Agraryo sa

panahon ni Presidente Corazon Aquino, halos kalabanan sang mga asyenda sa Banwa sang Murcia napaidalum diri. Apang 25 na ka tuig kag kapila na gin-extend ang programa, madamo pa ang wala napanagtag nga mga kadutaan sa mga asyenda diri nga banwa. Nagkalapudpod na ang tsinelas sang mga mamumugon pabalik-balik sa DAR apang promisa lang gihapon gikan sa Municipal Agrarian Reform Officer (MARO) ang ila nakuha.



Nahamtang sa Brgy. Minoyan, Murcia ang Headquarters sg 303rd Brigade Phil. Army. Proteksyon ini sa interes sg mga burukrata kapitalista, agalon mayduta kg komprador burgesya nga nakasentro sa Bacolod City, ang sentrong Syudad sg Negros Occidental nga 16.5 kilometros o 30-45 minutos halin sa Murcia.

ANG PAGKABUN-AG SG PAGHIMAKAS SG MANGUNGUMA KAG ANG PAGSULONG SG ARMADONG PAGHIMAKAS.

Sang tuig 1970 hasta 1990s nag-usbong ang paghimakas sang mga mamumugon sa kampo tungod sang indi tawhanon nga kahimtangan nila sa mga asyenda. Halos tanan nga mga mamumugon sa

asyenda naorganisa sa idalum sang National Federation of Sugarworkers (NFSW). Ginsulong sg mamumugon sa kampo ang ila paghimakas para maangkon ang mataas nga sweldo kg benepisyo lakip na ang mga farmlots.

Daku man ang nabulig sa pag-organisa diri sang mga madre sang Rural Missionaries of the Philippines (RMP) nga amo ang nagtudlo sang dignidad sang tawo kag naghatag sang kaisog sa mga mamumugon sa kampo nga ipakig-away ang ila kinamatarung

batuk sa pagpanghimulos kag pagpamapigos sang mga Hacienderos.

Ang ila kahimtangan nangin matambok nga duta para sa pagsampa sang kadam-an nga masa sa armadong rebolusyon nga ginapamunuan sang Partido Komunista sang Pilipinas. Sang tuig 1980s hasta 1990s. Madamo sang naghikot bilang lubos panahon nga mga organisador, kag nagsampa sa New People's Army. Nangin tuburan ini sang madamo nga mga kadre nga nagpamuno sa lain-lain nga patag sang hilikuton sang armadong rebolusyon sa Isla sang Negros.

Sang ginmilitarisa ang kaumhan sadtong 1990s, masobra isa ka gatos (100) ang nangin martir nga naghalad sang ila dugo para sa pag-alagad sa malapad nga pumuluyo. Diri man naggikan ang bag-o lang nangin martir sang NPA nga si ka "Boboy", ikalima nga martir sang pamilya Laurente. Daw pareho man sang uhong nga nag-usbong ang madamo nga detatsment sa mga Brgys.

Bunga sg sayop nga inya sadto sg Partido, temporaryo nagtahaw ang rebolusyonaryong paghimakas sa Murcia. Sang tuig 2000 pila ka nagpakuno-kuno nga mga organisasyon ang nagpromisa nga buligan sila pareho sang Task Force Mapalad (TFM), Partido ng Manggagawa (PM) kag Democratic Alliance of Labor Organization (DALO). Apang daku na nga kwarta ang nakuha sa mga farmer beneficiaries sang ini nga mga organisasyon wala sa gihapon nila makuha ang ila Certificate of Land Ownership Award (CLOA).

Sang nabalikan sa pag-organisa sang NFSW ang Murcia sang tuig 2010 diri kag nabukaran ang madamo nga anomaliya sang

DAR Murcia. Madamo nga mga pagtuon bahin sa ila kahimtangan ang gintudlo sa ila kag ginpahangup sila sang proseso sa pagpatigayon sang CARP. Diri nila nahangpan ang mga pagpanginto sa ila sang mga opisyaes sang DAR. Nagpasalamat ang masa nga nagbalik ang ila matuod nga organisasyon nga sinsero sa pag alagad sa ila.

Sa serye sang picket kag mga dayalogo nga ginhiwat sg mga mamumugon sa kampo, nabuko ang mga pagpanglanse sang DAR sa mga farmer beneficiaries:

1. Padayon ginapaaryenduhan sg mga opisyal sg DAR ang duta dira sa mga agalon mayduta, bisan pa may mga CLOA na ang duta, foreclose na sang bangko kag may Application of Purchase for Farmers Undertaking (APFU) na. Nagserbe nga mga broker sa duta ang mga opisyal sg DAR Murcia;

2. Bisan may CLOA na ang duta, wala gihapon gina-install ang mga benepisyaryo sa duta nga gin-aplayan sg farmer-beneficiaries;

3. Sang 1990s pa, ang iban may APFU na. Gintago lamang ini sg DAR kg naapwersa lamang sila nga ipagwa bangud sg pagpamilit na sg mga farmer beneficiaries sa panhon sg ila pikte sa DAR. Ang APFU amo ang katapusan nga proseso sa Provincial DAR agud mapasa na sa National kag ebalwahon ang ila duta sang Land Bank of the Phils. kag mahatag na ang CLOA;

4. Ginpangpahat-pahat hatag ang CLOA sa farmer beneficiaries kag ang daku nga porsyon sang kadutaan ginpabilin sa agalon kag ginapa aryenduhan; kag

5. Ang pinakadaku nga anomalya amo ang natabo sang 2010 nga pagbakal sang



Probinsiyal nga Gobyerno sang Negros Occidental sang 164 ektarya nga duta sa Had. Ilmnan kag Had. Arlocs nga ginpatindugan sang NEGROS FIRST RANCH nga napaidalum na sa CARP. Ginpangbuldoze ang talamnan kag kabalayan sang mga pumuluyo kag ginbutangan sang detatsment ang lugar.

LIWAT NGA PAGDABA-DABA SG REBOLUSYONARYONG PAGHIMAKAS SG MAMUMUGON SA KAMPO. Pareho sang 1980s kag 1990s daw kalayo nga naglapad liwat ang organisasyon sang NFSW sa mga asyenda, nga sinsero sa pagbulig sa mga mamumugon sa kampo nga maangkon nila ang kadutaan nga ila pangabuhian. Sa gihapon kaupod sa NFSW ginduso man ang paghimakas sa matarung nga suhol kag benepisyo kag pagpamatuk sa kontraktwalisasyon ukon sistemang pakyaw sa mga asyenda nga labi nga nagapanghimulos sa mga mamumugon.

Bangud sa tuman na nga gutom kag kaimolon kag malawig na nga paghulat nga ihatag sang gobyerno ang ila CLOA ginkultibar sg mga mamumugon sa kampo ang

duta nga ila gin-aplayan sa CARP. Nakita nila ang kakinahanglanon nga mag-organisa kag maghugpong liwat para ipakig-away sa gobyerno kag agalon may duta ang ila mga kinamatarung sa duta kag husto nga sweldo kag benepisyo.

Pareho sang 1990's ang solusyon sang gobyerno amo ang pagmilitarisa, pagpamahog kag pagharass sa mga pumuluyo. Ang mga asyenda nga ginkultibar sg farmer-beneficiaries gindeployan sang militar kag pulis para isuprer ang pumuluyo. Ila man ginpaandaman ang masa nga indi na magpatapu sa NFSW. Apang ang masa nagapanindugan nga kon wala sa NFSW wala nila nahangpan ang ila kinamatarung kag wala sila nakaangkon sang duta.

Ini nagapakita lamang nga ang armado nga paghimakas amo ang solo nga solusyon sa pagkahilway sang mamumugon sa kampo sa gapos sang pagka-ulipon sang pyudal nga agalon mayduta-dalagku nga komprador burgesya, burukrata kapitalista kg imperyalismo.

Bisan pa sa pagpakuno-kuno sg gobyerno nga nagaulikid siya sa masang mangunguma paagi sa sining peke nga repormang agraryo indi matago sang gobyerno ang pagkabangkarote kg pasistang dagway sining mala-kolonyal kag mala-pyudal nga sistema sang Pilipinas. Tuyo lamang sini nga paugdawon ang nagabalingaso nga balatyagon sg mga mamumugon sa kampo, mangunguma kag mamumugon.

Napat-ud sg mga nagahimakas nga mangunguma nga paagi lamang sa kadalag-an sang armadong rebolusyon, sg pungsodnon demokratikong rebolusyon, sa pagpamuno

sang proletaryado paagi sa Partido Komunista sang Pilipinas kaupod sa sahing ginapigos kag ginahimuslan, maangkon ang matuod nga reporma sa duta kag ang pungsodnon nga industriyalisasyon nga amo ang magahilway sa mga mamumugon sa kampo sa ginatos ka tuig nga pyudal nga pagka-ulipon.**AP**

KAWAD-ON SG PANGABUHAN SG MANGUNGUMA IDALUM SANG NEGROS FIRST RANCH NI MARANON, JR., NAGAPUKAW SG ARMADONG PAGHIMAKAS

“Maayo pa ang mga baka kag karnero, may kalan-on kag may puluy-an. Kami nga mga mangunguma wala na sg pangabuhian, wala pa sg puluy-an!” Amo ini ang singgitan sg mga mangunguma sa Banwa sg Murcia nga biktima sg kontra-pumuluyo, maki-kapitalista nga programa sg “Negros First Agenda” sg gobernador - agalon mayduta nga si Alfredo Maranon, Jr., nga ginatawag sg mga mangunguma nga “Lobo nga nagasuksok sg bayu sg karnero.”

Sa subong, madamu sg mangunguma ang nawad-an kg mawad-an pa sg duta nga pangabuhian kg puluy-an bangud sg Negros First Ranch nga Programa sg probinsya nga nagatuyo sa pagpatindog sg Breeding kg Dairy Farm sa probinsya. Wala na sg padulungan ang mangunguma kungdi ang mag-organisa sg ila kaugalingon kag magkadto sa kadalanan para ibuyagyag kag pamatukan ang pagkunsabuhay sg agricultural nga kapitalista, Department of Agrarian Reform (DAR) kg probinsyal nga gobyerno kag ipakig-away ang ila kinamatarung sa duta.

ANG GINAATUBANG NGA PROBLEMA SG MGA MANGUNGUMA. Likom sa ihibalo sg farmer-beneficiaries, ginbakal sg Probinsyal nga Gobyerno sg Negros Occidental, sa idalum ni Alfredo Maranon, Jr., sadtong Disyembre 29, 2010 ang 164 ektarya (101 ektarya kay Alfonso, 8 ektarya kay Gloria kag 55 ektarya kay George) nga duta nga ginapanag-iyahan sang pamilya



NEGROS FIRST!

Arguilles sa Hda. Ilimnan kag Hda. Arlocs sa Barangay Santa Rosa, Murcia, Negros Occidental nga napaidalum na sa Comprehensive Agrarian Reform Program (CARP) sang Department of Agrarian Reform(DAR) sa bili nga P24,321,625.

Ang duta orihinal nga ginapanag-iyahan ni Fernando Arguilles kag sang ulihi gintunga-tunga niya sa iya tatlo (3) ka kabataan nga sanday Alfonso Arguilles, Sr –

155 hectares, Gloria Arguilles – 105 hectares. Sa idalum sang CARP gin-aplyan sang duha (2) ka grupo sang Farmer Beneficiaries (FBs) ang duha ka asyenda – Hda. Ilimnan kg

Hda. Arlocs sa Brgy. Sta. Rosa, Murcia. Sg 1993, nagpasa sg Petition for CARP Coverage sa DAR ang 42 ka beneficiaries sang Hacienda Ilimnan para sa 155 ektarya nga duta ni Alfonso kag ang

24 ka benepisyaryo sang Hda. Arlocs sa duta ni George nga 55 ekt sang tuig 2000 kag sang tuig 2004 sa duta ni Gloria Arguilles.

Malapit sa 17 ka tuig ang paghulat sg 42 ka farmer-beneficiaries sg Hda. Ilimnan para mahatagan sila sg Certificate of Land Ownership Award (CLOA) sa idalum sg CARP sa 155 ektarya nga duta, matapos matuman kg masumiter ang tanan nga rekisito para ma-qualify sa programa.

Padayon sila nga nanging mamumugon sa kampo sang lain-lain nga arendador sang duta ni Alfonso kag nagatalauma sang ila magagmay nga farmlots para isapin-sapin sa ila pagkaon samtang nagahulat sang CLOA.

Nakibot na lamang sila sang nagkadto si Engr. Igmedio Tabianan, ang Provincial Agriculturist sadtong November 2010, kag ginhambalan ang mga pumuluyo nga untaton na ang ila pagtalauma sa amo nga duta tungod nabakal na sang probinsiya ang duta gikan sa tag-iya.

hectares kag George Arguilles – 55 hectares.

Bisan pa nahibal-an sg mangunguma nga ilegal ang transaksyon sa pagkunsabuhay sg MARO sa idalum ni Edwin Sanchez kag sg probinsiya, apang tungod Probinsiya mismo ang direkta nga nagpauntat sa ila, wala sila sang may nahimo.

Gilayon nga ginpangbuldoze ang uma sang 15 ka mangunguma nga may kalaparon nga 12 ektarya kag ginpangguba ang

balay sang 22 ka pumuluyo. Ginpangakuan lamang sila nga bayaran ang ila balay sa tag-P 10,000.00 amo man ang ila uma kag hatagan sila kuno sang trabaho sang probinsiya. Sa aktwal ginbayran lamang sila sg P10,000 kg P 5,000 para sa ila balay kag ang uma wala mabayaran.

Sa Hda. Arlocs, 24 ka mangunguma ang nag-apply bilang benepisyaryo sg CARP. Sa bahin sg duta ni Gloria Arguilles 115 ektaryas, 97 ektarya lang ang nahatagan sang CLOA kay ang 8 ka ektarya para retention sa tag-iya, nga questionable man gani kay wala man siya sang kabataan kay madre siya.

Ang sa iya ni George Arguilles may petition for CARP coverage na ang mga farmer beneficiaries sang tuig 2000 sa idalum sang iskema nga Voluntary Offer to Sell (VOS). Sang 2012 sa pagpicket sa DAR Murcia didto napilitan man ang MARO nga ihatag ang APFU nga napirmahan na sang farmer beneficiaries sang 2004 pa.



Samtang nagahulat ang mga farmer beneficiaries sang ila CLOA gulpi lang sang 2010 ginbaligya ini sa gobyerno probinsiyal kag ginhambalan lamang sila sang representante sang gobyerno probinsiyal nga ang duta indi na puede ipaidalum sa CARP. Sang ginpamangkot nila si MARO officer Edwin Sanchez ngaa amo sini ang natabo ginhambalan lamang sila nga mag apply na lang liwat kay ang ini nga propyedad ginbakal na sang gobyerno probinsiyal.

PAGKUNSA BUHAY SANG MGA AMD, DAR, AGRIKULTURAL NGA KAPITALISTA KAG GOBYERNO PROBINSYAL SA PAGBAKAL SANG DUTA SA HDA. ILLIMNAN. Nagdangop ang mga mangunguma sa Kilusang Magbubukid ng Pilipinas (KMP) kg National Federation of Sugar Workers (NFSW) para makigdayalogo sa gobernador. Wala sila ginatubang ni Maranon. Naghiwat sg Press Conference ang mga lider sg mangunguma sa Ilimnan sa tuyo nga maathagan angot sa problema.

Pagkatapos sang presscon nagpahayag ang Executive Secretary sang Gobernador nga si Atty. Jose Maria Valencia kag Engr. Enrique Pinongan, Provincial Administrator nga ang proyekto nga ipatuman sa Brgy. Santa Rosa, Murcia amo ang BREEDING STATION KAG DAIRY FARM sa idalum sang programa sang probinsiya nga NEGROS FIRST AGENDA.

Himuon ini nga NEGROS FIRST RANCH. Saguron diri ang 170 ka baka nga kuhaan sang gatas kag karne. Setenta (70) ka bilog sini nga baka nagabili sang P130,000 kag ginbakal pa sa New Zealand. Ang 100 ka bilog

ginbakal sa Sarangani kag nagabili sang P30,000 kada isa.

Para masuportahan ang pagbaligya sang duta sa probinsiya, ang opisyal sang MARO Murcia nga si Edwin Sanchez nagpagwa sang *certification* nga ang area indi produktibo gani indi puede ma cover sang CARP. Katingalahan bangud sg 1993 pa, ginpaidalum na ini nga duta sa CARP.

Tuig 2011, asud-asud nga naghiwat sang piket-dialogue ang NFSW kag farmer beneficiaries sang Hda Ilimnan sa DAR Murcia. Sa pila ka dialogue nga nahimo para paatubangon si MARO Officer Edwin Sanchez diri nadiskubrehan nga may CLOA na gali ang 54 ekt. sang 155 ekt. ni Alfonso sang Hda. Ilimnan nga gin-issue pa sang 2008. Mga 18 ka tuig ang ginhulat sang benepisyaryo para lang mahatag sa ila ang CLOA. Sang ara na ang CLOA gintago pa ini kag wala mahibaluan kon wala sa kusog sang pumuluyo nga nagpiket sa DAR Murcia sang 2011.

Madugay na nabayaran sang Land Bank of the Philippines ang tag-iya nga si Alfonso Arguilles. Apang, sa kunsabuhay sg MARO kg ni Arguilles, ginpa-arenduhan pa nila ang duta sa lain-lain nga agalon mayduta, kag ang malala pa, ginbaligya pa sa gobyerno probinsiyal. Magluwas nga wala pa nila ginrelease ang CLOA, ginpahat-pahat pa ang pag-issue sang CLOA kag indi sa bilog nga landholding ni Alfonso Arguilles nga gin-applyan sg mga mangunguma.

Sang 2012 nagloan sang P 80M sa Land Bank of the Philippines ang lokal nga gobyerno para ibakal sang karnero. Gintamnan sang Napier grass nga kalan-on sang karnero ang mga kadutaan.

Sang November 2013, nakalab-ot sa pumuluyo nga patamnan sang pinya sang gobyerno probinsyal sa Dole Philippines ang ini nga area pag-abot sg Enero 2014. Agud mapunggan ini nga tikang naghiwat sang 16 day camp-out sa DAR Provincial ang mga mangunguma sadtong Enero 6 tubtob 22, 2014. Ginpanginwala sang gobyerno probinsyal nga paarenduhan nila ini sa Dole Philippines. Nga sg ulihi, ila naman gin-ako nga ini arenduhan sg Dole Philippines para tamnan sg pinya.

February 14-16, 2014, naghiwat sang piket, camp out ang mga mangunguma sa DAR Murcia. Sa sini nga camp-out napilitan nga ihatag sang MARO ang dokumento nga nagapakita nga sang 1998 pa may Application of Purchase for Farmers Undertaking (APFU) na nga gin-issue para sa duta ni Alfonso.

Nagpadala sulat ang DAR National sang March 12, 2014 nga i-comply sulod sg 30 ka adlaw sang Provincial Government ang requirements para sa exemption for CARP coverage sang duta sang Ilimnan. Nagpangayo extension ang probinsiya sa PARO hasta sa tapos bulan sang Abril.

Sa sini makita nga una pa ang

pagbaklanay kag pagposisyon sang sa pagcomply sa requirements for exemption sang probinsiya.

Sini man nga Marso nagpagwa sang desisyon ang DAR Provincial Officer (PARO) Tess Mabunay nga hatagan sang Notice of CARP coverage (NOC) ang ginbakal sang probinsiya tungod kuno wala pa ma annotate sa titulo ang baklanay sa tunga sang probinsiya kag tag-iya. Apang kon magposisyon kuno ang mga tawo sa duta mangin illegal sila. Pero sang nagbakal ang probinsiya sang duta nga kahibalo man sila nga ara na sa CARP coverage kag ginpang-arado ang mga talmnan sang mga mangunguma kag ginpangbulldoze ang mga balay indi ini illegal.

PADAYON NGA PAGHIMAKAS SG MANGUNGUMA SA TUNGA SG MILITARISASYON. Sadtong Septyembre 2011, naghiwat sg isa ka Investigative Mission ang NFSW, KMP kg pila ka indibidwal sa Hda. Ilimnan para idokumento ang detalye sg pagpangharass sa pumuluyo. Imbes sabton ang reklamo sg mangunguma, ginbutangan sg detachment ang area kg naghire sg mga



berdugong RPA para pahugon ang mga pumuluyo kag ginbulldoze ang ila pamalay kg ulumhan.

2011-2013 nagpadala sang komunikasyon ang NFSW kag lokal nga lideres sa DAR Region VI kag DAR National para pungan ang pag-take-over sang probinsiya sa duta. Indi man sila makasulod sa natungdan nga duta tungod may mga militar na nga nagabantay kag ginhambalan sila nga nagpasaka kaso ang gobyerno kag didto na sa Supreme Court gani status quo anay.

Sang Marso 5, 2014, nagtinguha nga bawion sang mga mangunguma ang ila duta nga ginatalauma tungod sa grabe na nga gutom kag kaimolon. Sa pagpamuno mismo sg Provincial Commander nga si Milcu Lirazan, upod ang RMG kag militar, ginpamahog, ginpangharass kag ginpangtabog ang mga mangunguma.

Sang ulihi nga semana, ginpataklaran traktora ang mga tanom sg pumuluyo kag ginpang-arado ang mga tanom nga kamote kg balinghoy kag pagkatapos ginpangayo pa sg mga Pulis kg gwardya. Ini nga tanom ginpangutangan pa sg mga mangunguma para lang may gastuhon sa pagpatanom kg pag-abono. Maisog man nga ginpungan ini sg masa paagi sa pagbalabag sa mga traktora.

Sa subong ululupod ang Hda. Ilimnan kag Hda. Arlocs farmer-beneficiaries sa ila paghimakas nga maangkon ang matuod nga repormang agraryo kag indi lang paagi sa peke nga CARP. Ila nakita nga ang "food security program" sang gobyerno para lang sa mga baka kag karnero indi sa mga pumuluyo sa sini nga lugar.

Mas labi nga naglig-on ang paghiliusa kag pagkaresolbado sg mga mangunguma sa pagsulong sg rebolusyong agraryo. Nahangpan sg mangunguma nga indi na gali bastante ang ila legal nga paghimakas kag kinahanglan mas labi pa nga magtaas ang lebel sg ila paghimakas, bisan pa magsulong sg armadong paghimakas.

Napukaw ang rebolusyonaryong tradisyon sg mga mangunguma kag mamumugon sa uma sa Banwa sg Murcia. Kag sa indi magdugay, liwat magabaga ang kadutaan sa pag-igting sg armadong paghimakas! **AP**

**GOBERNADOR
MARANON, LOBO
NGA
NAGASUKSOK
SANG BAYO SANG
KARNERO, SUNO
SA PKM-NEGROS**

Gintawag sg Pambansang Katipunan ng Magbubukid (PKM)- Negros ang gobernador sg Negros Occidental nga si Alfredo Maranon, Jr., nga "Lobo nga Nagasuksok sg Bayo sg Karnero", bangud sg kontra-pumuluyo nga programa sg Negros First Agenda nga nagawasak sa duta nga pangabuhian kg nagadula sg seguridad sa pagkaon sg pumuluyo. Samtang ginatib-ong niya ang interes sg mga kapitalistang inbestor katulad sg multinational corporation nga Dole Phils. dalagkung komprador burgesya kg agalon mayduta programa sang nagliligad nga mga administrasyon. Kasugpon lamang ini sang Oplan Bantay Laya ni Gloria Macapagal Arroyo nga nagpatay sa masobra 1,400 ka inosenteng pumuluyo.

Si Maranon aktibo nagasuporta sa kontra-insurhensya nga programa sang US-Aquino nga rehimen nga ginapatuman sang Armadong Kusog sang Pilipinas nga Oplan Bayanihan, nga wala sang kinalain sa Ginpahumot lamang nila ini sa kuno “people-centered approach” kag “whole-of-nation approach”.



Ginagamit niya ang pondo sang probinsiya sa kuno paghatag sang livelihood projects sa 44 kuno nagsurrender kag nagbalik sa sabak sang gobyerno nga mga anay rebelde sa probinsiya. Masupog man siya magsaka sa kabukiran kaupod sa militar para sa aktibidad nga “Peace Rally” sa kuno mga ginatumod nga sona sang New People’s Army diri sa Negros. Nagahambal siya sang mahumot nga pamulong-pulong sa mga tawo kag nagahatag sang kuno livelihood projects sa mga pumuluyo sa diri nga lugar kay amo ini kuno ang makadula sang kaimolon sang pumuluyo sa kaumhan kag mahilayo sila sa impluwensiya sang mga rebelde.

Samtang nagapadayaw ini sg kalinong kg kauswagan, pagsuprer, pagpamigos kag pagpanhimulos ang ginahimo sini sa pumuluyo paagi sa pagpang-agaw duta sa kabukiran gamit ang programa nga Negros First Agenda, pagmina, pagtib-ong sa interes sg mga MNCs kag agrikultural nga kapitalista katulad sg Dole Phils.

Ang pamilya ni Gobernador Alfredo Maranon, Jr. nagapanag-iya sang malapad nga kadutaan sa Syudad sang Sagay nga natamnan sang malapad nga katubuhan. Sila ang nagakontrolar sang pulitika sang sini nga Syudad kag ang ila inpluwensiya naglab-ot hasta sa probinsiya. Iya utod ang sadto anay Gobernador man nga si Joseph Maranon.

Sa panahon man sang iya utod sa gobyerno probinsyal gindemolish ang masobra 500 ka pamilya nga imol nga taga-syudad nga nagdula sa mapa sg 3 ka barangay sang Bacolod. Ang lugar ginpatindugan lamang sang organiko nga mga pagkaon kag ginahiwatan sang “organic fair” sa kada tuig. Sa subong ini ginbaligya na sa Ayala Land Corporation para patindugan sang isa ka mall bilang pagsabat sa kapritso sang mga kalahi niya nga burgesya kag paghatak sang mga

dumuluong nga kapital para sa ila negosyo.

Ang kasaysayan sang ila pamilya, kasaysayan sa pagpamanggad gikan sa balhas kag dugo sang masang anakbalhas. Sila ang representante kag protektor sa interes sang malapad nga agalon mayduta kag dalagku nga komprador burgesya.

Manugtapos na ang iya termino sa tuig 2016. Apang sa sulod sang iya pagdumalahan kapila na magpanawagan sang dayalogo ang mga mangunguma, farm workers kag imol nga taga-syudad agud istoryahan ang mga reklamo kag problema sg pumuluyo. Ang iya lamang ginabala masami amo ang iya executive assistant nga si Atty. Jose Maria Valencia nga ang sabat masami sa problema sang pumuluyo amo ang paghatag sang pila ka sako nga bugas kag sardinas.

Sang Enero 22, 2014, sang magkadto sa kapitolyo ang mga mangunguma, imbes atubangon kag pamatian, ginsiradhan ang Kapitolyo Probinsiyal kag ginbaralan sang kapulisan ang pwertahan. Naglab-ot pa sa sakitanay sa tunga sang pulis kag raliyista agud makasaka sa kapitolyo probinsyal. Apang sa gihapon bulag kag bungol siya kag padayon nangin sirado ang iya talatapan kag tagipusoon para sa pumuluyo.

Indi matabunan sang iya pagpakuno-kuno ang iya ginhimo nga pag-agaw sa 164 ektaryas nga duta nga napaidalum na sa Comprehensive Agrarian Reform Program (CARP) kag ginpatindugan sang NEGROS FIRST RANCH. Ginpangbuldoze ang ulumhan kag kabalayan sang pumuluyo nga mga Agrarian Reform Beneficiaries sa Hda. Arlocs kag Hda. Ilimnan sa Brgy. Sta Rosa, Murcia nga nagdislokar sang masobra 120 ka pumuluyo. Iya pa ginpasulabi ang mga baka kag karnero nga may kalan-on kag puluy-an sang sa pumuluyo nga ginagutom kag ginatugnawan. Mas malahalón pa ang kasapatan sang sa kabuhi sang katawhan nga iya dapat alagaran.

Si Gobernador Alfredo Maranon, Jr. postura sang burukrata kapitalismo nga salot sa kabuhi sang pumuluyo. Ginagamit ang gobyerno para magpabilin ang gahum sang dalagku nga agalon mayduta, dalagku nga komprador burgesya para magpabilin ang ila gahum kag mapaseguro ang kinahanglanon sang ila agalon nga Imperyalistang Estados Unidos. Sila mga lobo nga nagapanago sa bayo sang karnero.

Kon indi mawasak ang Imperyalismo, Pyudalismo kag Burukrata Kapitalismo nga amo ang tatlo ka ugat nga problema sang pungsod Pilipinas indi mahukas sa pagkahigot sa paghimulos kag kaimolon ang 99% nga pumuluyong Pilipino. Indi magbag-o ang kahimtangan sang Haciendero – Dalagku Agalon May Duta - Kumprador Burges kag Mamumugon sa Kampo diri sa Negros. Magapabilin nga mangin bulkan sosyal ang Isla sang Negros nga malapit na maglupok tungod sa pagngurob sang sobra na ka init kag pag-antus sang masang anakbalhas.

Ang pagpadasig sa paglab-ot sang rekisito para sa pagpataas sang Inaway Banwa, ang paglab-ot sa estratehiko nga pagkapatas tubtob sa lubos nga kadalag-an sg pungsodnon demokratikong rebolusyon amo lamang ang solo nga makahilway sang malapad nga masang anakbalhas. **AP**

Pabakuron ang Kontra-Pyudal nga Nagahiliugyon nga Prente

Marso 30, 2014

(Pamulong-pulong nga ginpahayag sa Amsterdam, The Netherlands sa okasyon sg ika-45 nga Anibersaryo sa Pagtukod sa NPA)



Luis Jalandoni

Chief International Representative

NDFP National Executive Committee

Natabo ini sa bukiran sg Negros sa Sentral Philippines, gilayon matapos ang pag-imposar ni Marcos sg martial law. Gindiskas sa akon sg mga imol nga mangunguma ang ila paghimakas sa pagpabilin sa ila duta. Ang dalagku nga mga agalon mayduta nga suportado sg militar nagatabog sa ila. Ang isa ka mangunguma nagdeklarar: “Hasta may hangin ang ilong ko, indi ko gid pagbayaan ang duta ko!_”. Sa mapainubsanon nga pamaagi siya ang nagggiit sini.

Mga kaupod kg mga abyan, gusto ko maghambal bahin sa kontra-pyudal nga nagahiliugyon nga prente sg rebolusyonaryong kahublagan. Gintumod ko ini nga kongkreto nga eksperyensya upod sa mga imol nga mangunguma, bangud ang ila malig-on nga determinasyon sa pagpakig-away para sa ila duta amo ang katulad sg bato nga pundasyon sg kontra-pyudal nga nagahiliugyon nga prente.

Ang Mayor nga Kaundan sg Demokratikong Rebolusyon sg Banwa

Ang mayor nga kaundan sg demokratikong rebolusyon sg banwa amo ang agraryong rebolusyon. Ini ang sandigan nga demanda kag handum sg malapad nga populasyon sg Pilipinas, ang mangunguma. Sitenta’y-singko (75%) sg 100 milyon nga populasyon sg Pilipinas ginabug-os sg mangunguma kag mamumugon sa uma. Ang pag-abanse kg kadalag-an sg demokratikong rebolusyon sg banwa nagadepende sa katumanan sining sandigan nga handum. Ini ang nagabug-os sg pinakapundamental nga demokratikong kaundan sg rebolusyon sa Pilipinas.

Gani, nagakaangay lang gid nga ang Partido Komunista sg Pilipinas (PKP) magtalana sg kontra-pyudal nga nagahiliugyon nga prente bilang pinakasentro sg rebolusyonaryong

paghimakas sa Pilipinas. "Magsalig sa imol nga mangunguma kg mamumugon sa uma; kabigon ang nahanungang mangunguma; nyutalisahon ang manggaranon nga mangunguma; hingalitan ang kontradiksyon sa tunga sg despotiko kg dalagku nga agalon mayduta sa isa ka bahin kag sa nasanagan nga agalon mayduta sa pihak nga bahin, agud gub-on ang gahum sg agalon mayduta sa kaumhan. Amo sini ang polisiya sg PKP sa kontra-pyudal nga nagahiliugyon nga prente.

Kombinasyon Sg Agraryong Rebolusyon, Pagtukod Sg Baseng Masa Kg Armadong Paghimakas

Sa sulod sg 45 ka tuig sg rebolusyonaryong paghimakas sa Pilipinas, ang kombinasyon sg agraryong rebolusyon, pagtukod sg baseng masa kag armadong paghimakas nagresulta sa pagkatukod sg pulang

pulitikal nga gahum sa masobra 110 ka larangan gerilya sa 71 sa 81 ka probinsya sg pungsod. Ang demokratikong gobyerno sg pumuluyo ang gintukod sa masobra napulo ka libo ka baryo kg pila ka munisipalidad.

Ang minimum nga programa sg agraryong rebolusyon ginabug-os sg pagpanubo sa arkila sa duta, ang pagdula o

pagpa-ubos sa usura kg ang pagpataas sg sweldo sg mga mamumugon sa uma. Ginatigayon ini sa mga larangan gerilya. Sa iban nga erya kun diin bastante ang kabaskugon sg asosasyon sg mangunguma, ginatigayon ang maksimum nga programa sg kumpiskasyon sa duta kg libre nga pagpanagtag. Ang kadalag-an sa agraryong rebolusyon nagabenepisyo sa pila ka milyon nga mangunguma kg mamumugon sa uma.

Dugang nga kadalag-an sa agraryong rebolusyon amo ang pagpauswag sa presyo sg produkto sg mangunguma, pagtukod sg simple nga kooperatiba kg saydlayn nga trabaho para sa pagpadaku sa income. Ini nga mga kadalag-an nangin posible bangud sg

pagpatuma n kg pagpabako d sa linya sg kontra-pyudal nga nagahiliugyon nga prente sg PKP. Ang masang mangunguma ginaorganis



a sg PKP kag ginasuportahan sg New People's Army (NPA) kag sg National Democratic Front of the Philippines (NDFP). Ginadepensahan sg NPA ang mga kadalag-an sg masang mangunguma.

Ikaayong-lawas, Edukasyon kg Kultural nga mga Programa

Iban pa nga
kampanya sg
mangunguma kg
mamumugon sa
uma katulad sg
kampanya sa
ikaayong-lawas,
edukasyon lakip
na ang
rebolusyonaryong
edukasyon,
literasiya kg



numerasiya kag kultural nga programa,
nagaserbe sa konsolidasyon sg organisasyon
sg mangunguma. Ang mga medik sg pumuluyo
nagatigayon sg “Klinika ng Bayan”, kun diin
may medikal nga pag-atipan, akupangkura,
herbal nga mga bulong kg iban nga Western
nga bulong ang ginahatag sa mga residente sg
baryo. Nagahatag man sila sg edukasyon sa
kalimpyo kg prebentibong medical care.
Ginatigayon man ang mga kampanya katulad
sa kontra-malaria.

Ang mga eskwelahan sa primarya kg
sekondaryong lebel nagahatag sg literasiya kg
numerasiya nga mga klase kg
rebolusyonaryong edukasyon sa Philippine
History, ang sandigan nga problema sa
imperyalismo, pyudalismo kg burukrata
kapitalismo, kg ang programa sa
demokratikong rebolusyon sg banwa.

Ginatigayon man sg mga grupo
pangkultura ang mga rebolusyonaryong kanta,
binalaybay, teatro nga nagahatag inspirasyon
sa masa kg nagatib-ong sa maki-pumuluyo,
siyentipiko kg pangmasang kultura, nagakuha
pangabuhian kag sa palibot. Nagapakighiusa
man sila sa mga mangingisda nga

gikan sa manggaran
nga tradisyon kg
eksperyensya sg
rebolusyonaryong
paghimakas sg
pumuluyo.

Ang Malig-on Nga Pagpamuno Sg Imol Nga Mangunguma Sa Asosasyon Sg Mangunguma

Ang imol nga mangunguma kg ang
manubo sa nahanunga nga mangunguma nga
amo ang nagabug-os sa madamu nga
mayoriya sg mangunguma nagaabaga sg
pagpamuno sa mga asosasyon sg
mangunguma. Ang nahanunga-sa-nahanunga
nga mangunguma, nga ginatabog sg mga
polisiya sg US-Aquino nga rehimen sa mas
madalum nga kapigaduhon, nagaupod sa imol
kg manubo sa nahanunga nga mangunguma
sa militante nga pagpamatuk sa despotikong
agalon mayduta kg sg Aquino nga rehimen.

Ang mga manggaranon nga
mangunguma, nga ang kadam-an nangin
pigado bangud sg pagpang-agaw duta sg
dalagkung agalon mayduta, korap nga mga
politiko kg militar, ang ginanyutralisa kg
ginakabig sg asosasyon sg mangunguma.

Ang asosasyon sg mangunguma
nagapakighiusa sa mga tumandok nga
nagahimakas batuk sa dumuluong nga
kompaniya sg mina, nga nagaagaw sa duta sg
ila katigulangan kg nagawasak sa ila

nagahimakas batuk sa mga trawlers nga ginapanag-iyahan sg dumuluong nga nagawasak sg ila palangisdaan kg sg korap nga mga politico nga nagabaton sg “lagay” gikan sa dumuluong nga kompaniya sa pagpangisda. Sining ulihi lang, ang mga mangunguma, mga tumandok kg mangingisda ang nagabatas sa lapnagon nga kahalitan nga gintuga sg kalamidad kg sg kontra-pumuluyo nga polisiya sg US-Aquino nga rehimen.

Ang “No Build No Dwell Zones” ni Aquino sa mga Erya nga Apektado sg Yolanda

Nagdeklarar si Aquino sg “no build and no dwell zones” nga nagasakop sa 40 metros gikan sa higad baybay. Ginadingutan sini sg puluy-an ang minilyon ka mangingisda.

Ini nga kadutaan gin-alokar ni Aquino sa mga kroni nga kapitalistang negosyante para patindugan sg resorts. Ining iskandaloso nga polisiya ni Aquino nagpaakig sa mga mangunguma kg mangingisda nga naglunsar sg ila militanteng pagpamatuk.

Organo sg Gahum Pampulitika sa 71 ka Probinsya

Pila sa kadalag-an sg kontra-pyudal nga nagahiliugyon nga prente amo ang pagtukod sg organo sg gahum pampulitika nga nagabase sa organisasyon masa sg mamumugon, mangungma, kababaeahan,

pamatan-on kg kabataan kg kultural nga mga aktibista. Ining organo sg demokratikong gahum nagabug-os sg demokratikong gobyerno sg pumuluyo sa baryo nga lebel, kag sa iban nga erya sa municipal nga lebel. Ang Pulang gahum pampulitika nagalapta sa kabug-usan sg 71 ka probinsya sg pungsod.

Ang kadalag-an sg agraryong rebolusyon nagapainit sa entusiasmo sg mangunguma para sa rebolusyon. Handa sila maghatag sg ila pinakamaaayo nga mga kabataan sa New People’s Army. Samtang nagadaku ang agraryong rebolusyon kg pagtukod sg baseng masa kag nagakonsolida ang mga organo sg

gahum pampulitika, nagaabanse ang Inaway Banwa.

Ang PKP nagdeklarar nga handum sini lab-uton ang halintang sg estratehikong pagkapatas sg inaway banwa, halin sa karon nga halintang sg estratehikong depensiba, sa maabot nga tinuig.

Mga kaupod kg mga abyan, sa pinakapundamento sg tanan nga kadalag-an sa malapad nga kaumhan, dinamiko nga nagaangot sa NDFP kg sa pungsodnon nagahiliugyon nga prente kg rebolusyonaryong kahublagan masa sa kasyudaran, amo ang paghigugma sg mangunguma sa duta kg sa iya wala’y kamatayon nga determinasyon nga makig-away para diri. Sa pagtakop sg akon pamulong-pulong, gusto ko ipaambit ini nga binalaybay nga nagapabutyag sa paghigugma sg mangunguma sa duta.



KUN MAKAHAMBAL ANG DUTA

Kun makahambal ang duta
Magahambal ini para sa aton,
Magahambal ini, katulad naton, nga ang mga tinuig
Nagpanday sa paghugpong sg kabuhi nga naghigot upod sa
aton.

Ang aton kusog pangabudlay ang naghimo sg duta kun ano siya
karon,

Kag ang iya pagbunga nga nagahatag sa aton sg kabuhi,
Kita kg ang duta isa.

Pero sin-o ang magpamati?

Mamati ayhan sila,

Yadtong indi makita,

Sin-o, ang gikan sa indi mabatyagan nga distansya, nagaangkon
Nga ang duta ila?

Bangud ginsiling sg pinanid sg mga papel?

Bangud ang pinanid sg mga papeles nga ginabak-apan sg
mga tawo

Nga nagawakal sg mapanghadlok nga mga tinaga,

Mga tawo nga may gahum magpaniro kg magpatay,

Mga tawo nga may gahum sa pagpahilayo sg aton mga tawo
kg mga kabataan?

Kun makahambal ang duta

Magahambal ini para sa aton!

Bangud kita ang duta!

Lubos Asosasyon Masa Natukod Bisan Pa Sg Masingki Nga Operasyon Militar

Sa tunga sg mabaskog nga operasyon militar sa Larangan Gerilya sg Norte nga bahin sg Negros, liwat naman ginpamatud-an sg masang mangunguma ang ila rebolusyonaryong kaisog kg militansya sg ila ginpundar ang mga Lubos Asosasyon Masa (LAM) sg Pambansang Katipunan ng mga Magbubukid (PKM) sa tunga sg padayon nga pagsulong sg mangunguma sg rebolusyong agraryo bilang pundamental nga kaundan sg pungsodnon demokratikong rebolusyon, sg nagligad lang nga mga binulan.



Ginduso sg masang mangunguma ang ila demokratikong kinamatarung sa idalom sg balayon sg Rebong Gobyerno sa pagpili sg mga opisyaes nga magatib-ong sa interes sg mangunguma angot sa pagpatuman sg Matuod nga Reporma sa Duta nga wala sg sweldo man o pribelihiyo. Ginpakita sg masa ang ila ikasarang sa pagpadalagan sg ila kaugalingon nga gobyerno. Yabe ang pagpataas kg pagpabakud sa Rebong Organisasyon Masa sg sahing mangunguma agud mabugkos ang ila hiniusa nga kusog kg madinalag-on nga malab-ot ang katumanan sg Agreb sa partikular kag sg DRB sa kabilugan.

lipod man sa ihibalo sg kaaway, ginlunsar ang serye sg mga pagtuon sa Konstitusyon sg PKM, pagtuon sa Kongkretong Kahimtangan sg baryo nga nasakupan para tumuron ang mga mayor nga problema kg makadihon sg programa nga magasolbar sini, kg may mga ubay sa pagpadalagan sa ila Rebong Organisasyon kg Gobyerno.

Sa aktwal nga mga Asembliya (Kumbinasyon sg Heneral kg Representatibong Asembliya), na-ileher ang mga Nagapamunong Konseho sa basehan sg ila rebong panindugan kg ikasarang. Gindeklarar sg masa nga paslaw naman ang kaaway sa pagpatay sa nagaindakal nga rebong handum kg diwa sg masang mangunguma kg ginhimuslan.

Sa panakop sg Asembliya, sa gin-isa nga tingog ang masa nagpalanambiton, “Ang masa kun ma-organisa, daw bulkan nga may ibuga!” **AP**

Reklamo Sg Pumuluyo Batuk Sa Despotikong Agalon Mayduta Gin-Aksyunan Sg NPA

Daku nga kalipay ang nabatayagan sg mga masa sa mga barangay sg Camansi kag Tampalon, Kabankalan City, sg madinalag-on nga ginsulod ang asyenda Had. Sta. Isabel kag ginsunog ang traktora kg 2 bodega kg pagdis-arma sa abusador nga mga gwardya sg despotikong agalon mayduta nga sanday Pablito “Jin” kg John Paul Sola, mag-amay, sadtong Enero 22, 2014 alas 10:00 sg gab-i. Gintigayon ini sg yunit sg New People’s Army (NPA) idalum sg Armado Sumayang, Jr. Command, Southwest Negros.

Magluwas sa pagsunog sg 1 ka traktora kg 2 ka guardhouse, nakuhaan ang mga gwardya sg 5 ka matag-as kalibre nga Shotgun, 1 ka .38 rebolber, 1 ka Hand Grenade, 1 monocular night vision goggles, 1 telescope kg ginkuha ang pila ka karnero kg ginpakaon sa ila mga obreros.

Sang tuig 2011, si Pablito Sola ang ginpadal-an sg subpoena sg rebolusyonaryong Korte sa Larangan Southwest kg sg ulihi ginpapanaug na ang Warrant of Arrest batuk sa iya. Samtang, si John Paul Sola sg ulihi nagadamu naman ang reklamo sg pumuluyo batuk sa iya.

Kalakip sa mga kaso batuk sa ila amo ang mga masunod: pagpang-agaw duta sg 17 ka mangunguma nga nagalab-ot sa 11.9 ektarya kg ginpahalban sg karnero ang mga tanom sg mangunguma sadtong 2009; pagpangsunog sg 4 ka panimalay; pagtiro sg karabaw sg masa nga hasta subong wala gid



nabayran; pagharas kag pagpalupok batuk sa 10 ka mangunguma agud pahalinon sa ila ginatalauma; pagpahalab sa mga karnero sa mais nga tanom sg masa; pagpanghagbas sg maisan sg masa; pagpalupok; pagpamahog sa pumuluyo kag bisan sa surbeyor sg Department of Agrarian Reform (DAR); kag manubo nga pagpangsweldo kg pagpanakit sa mga obreros.

Magluwas sini, masami man ginapasakaan kaso sg pamilya Sola ang mga mangunguma agud pahugon kag perwisyuhon ang pangabuhi sg mangunguma, nga sa masami nagakadismis man lang.

Bangud sg mabaskog nga impluwensya sg pamilya Sola sa barangay kg sa 47th IB PA kg Regional Public Safety Maneuver Platoon (RPSMP), nangin wala sg pulos ang mga yamo kg reklamo sg mga mangunguma angot sa kalakasan ni Pablito kag John Paul. Kag sa baylo, mangunguma pa ang ginabalikan kg

ginapahog sg mga army nga mga tigsuporta kuno sa NPA.

Kun madumduman ang amay ni Pablito nga si Pablo Sola, anay Mayor sg Kabankalan City ang ginsilutan kamatayon sg rebolusyonaryong korte sadtong dekada 80 bangud sg maakasigli nga krimen nga murder, arson, pagpang-agaw duta, pagpamahog kg iban pa.

Sa pagtuon sa kasaysayan sg Brgy. Camansi kg Tampalon, ang kadutaan nga ginpastuhan kg gin-asyenda nila Pablo, kadutaan ina nga ginhawan sg pamilya Gatillas humalin pa sg dekada 40. Apang ang tagsa ka mahawan kg mahimong produktibo nga duta, gina-agaw ni Pablo paagi sa direkta nga pagpamahog, pagpadala sg mga Pulis,

pagpasaka kaso kag pagpapreso sa mangunguma. Kag karon, ang duta nga ila gina-angkon napaidalum na sa Comprehensive Agrarian Reform (CARP) kag ginaposisyunan na sg mga tawo, pero ila pa pilit ginpatamnan sg kasla sadtong 2009 kg ginapastuhan sg karnero.

Daku ang pagpasalamat sg pumuluyo sa mga NPA bangud para sa ila nahatagan sg hustisya ang ila madugay na nga mga reklamo.

Samtang, nahublasan naman ang AFP kag PNP sa ila matuod nga kinaiya nga nagaserbe sa nagaharing sahi sg agalon mayduta kg kumprador burgesya agud piguson ang masa sg pumuluyo.**AP**

Komperensya Sang PKM Mabinungahon

Madinalag-on nga natigayon ang Komperensya sg Pambansang Katipunan ng Magbubukid (PKM) sa Syudad sg Himamaylan kag Kabankalan sadtong ikaduha nga semana sg Enero 2014 nga gintambungan sg mga representate sg mga Komite Pang-organisa sg PKM kag Lubos Asosasyon Masa (LAM) sg PKM gikan sa lain-lain nga mga barangay.

Sa amo nga Komperensya nagreport ang tagsa ka representate sg resulta sg pagtasa sg tagsa ka tsapter sa barangay. Ginsundan ini sg pagtuon sa Pahayag sg Komite Sental sg Partido Komunista sg Pilipinas (KS-PKP) sa ika-45 nga anibersaryo sg liwat nga pagtukod sa PKP kag ang Disyembre nga isyu sg *Ang Paghimakas*. Ginpasadahan man ang 6 ka bulan nga



programa sg PKM ilabe na ang gindihon nga plano sa kampanya batuk sa pagpang-agaw duta sa kaumahan. Gilayon naghimo sg mga resolusyon ang Komperensya angot sa pagpadasig sg pagorganisa kg pagpalambo sg ila organisasyon masa. Lakip man sa resolusyon amo ang pagpauswag sg ila pangabuhian paagi sa pagpauswag sg ila panguma gamit ang siyentipiko kg sustainable nga agrikultura, nga magluwas nga indi gastuso, mainabyanon pa sa palibot kg ikaayong-lawas sg pumuluyo.

Nainspirar kg nahangkat ang mga tumalambong sa Komperensya nga pauswagon ang ila pagpanguma sg makita nila ang bidyo nga “Buhay Komunista” nga nagtalakay sa pagpauswag sg produksyon sg Hukbo kg sg pumuluyo.

Ginlakip sa resolusyon ang pagtalana sg mga iskedyul sa pagtuon sa “Sustainable Agriculture”.

Nagpauli ang mga tumalambong nga puno sg kalipay kag determinasyon nga lab-uton ang nahiusahan nga programa, bisan pa man wala sg untat ang military operation sa ila lugar.

Gintakpan ang amo nga Komperensya sa mga kultural nga palagwaon sg mga katapu sg Kabataang Makabayan (KM), ang likom nga organisasyon sg pamatan-on. **AP**

Harasment sa PDT sa Brgy. Winaswasan, Calatrava

Ginharass sg yunit sg New People's Army (NPA) idalum sg Roselyn Pelle Command, Larangan Gerilya sa Norte sg Negros, ang 8 ka katapu sg Peace and Development Team (PDT) sg 62nd IB PA, samtang naga-obra sg ila mga payag nga nagserbe ila detatsment sa Brgy. Winaswasan, Calatrava, sadtong alas 9:40 sg gab-i sg Pebrero 17, 2014.

Minutos antes ang ginhimo nga anay temporaryo ang mga sibilyan nga ara sa harassment, ginpahalin malapit sg detatsment agud malikawan ang ila pagkasalabat. Ginahimo nga trensera o taming sg Army ang pumuluyo sa palibot.

Ini nga harassment gintigayon bilang silot sa miitar sa ila kontra-pumuluyo nga aktibidad katulad sg pagpamahog sa pumuluyo para indi magsuporta sa NPA, pagpamilit sa pagsurender sg masa kag isa na diri si Jeroy kag pagpamahog nga kun ma-raid sila sg NPA, ila pasakaan sg kaso ang masa.

Sa una nga bugso sg lupok gikan sa mga NPA, wala gid nakabalos palupok ang kaaway. Nakabalos na lang ang apat (4) nga nagasinggitanay nga kaaway sg pagmando “untat lupok” sg CO sg Hukbo.




Pilason ang 2 ka kaupod nga naigo sg bala kg shrapnels sg M203. Kag sa proseso sg pag-atras ginabulong ang 2 ka pilason, apang makaligad ang malapit isa ka adlaw, napatay si Ka Exor bangud sg grabe nga igo sa iya tiil kg sa lawas.

Suno sa pumuluyo, may lima (5) ka Army nga ginatabunan sg trapal kg indi pagpapalapitan sa mga tawo, nga ginapatihan napatay sa amo nga harassment kag may tatlo (3) ka pilason nga nagaduyan-duyan pa.

Bangud sa naangkon nga kahalitan, ang mga pasistang Army nagpamalay-balay sg pamahog sa pumuluyo nga kun mahibal-an lang kuno nila ang kaangtanang sg pumuluyo sa harassment, ila ini kasuhan kag si Jeroy padayon nila ginapasurender kay kun indi magsurender pasakaan nila sg kaso.

Daku gid ang kalipay sg masa sa mga Banwa sg Toboso kg Calatrava sa natabo nga harassment bangud napamatud-an nila nga sa pihak sg pagpahambog sg AFP nga nagahuyang na ang NPA, liwat ini nga nagbalik kg liwat nila nabatian ang lupok sg pusil sg ila Hukbo. **AP**



KA EXOR

Gin-assault mo ang kaaway dala ang M16
Kg ginpukan ang mga nagakatulog,
Ang imong pouch nga may load nga MK kg
CARHRL
Sa mga namuklat ikaw nabantog

Sa imong pagsustain gamit ang M14,
Ang mga kaupdanan imong ginpadasig
Nga sa nahamtangan sa Rebolusyon dili maghalin
Hangtod pagpanghimulos indi pa mawahig

Ginbungkag mo ang hanay sg kaaway sa
pagpalupad mo sg M203,
Naglagapak sa diin nakita ang nagpakabuta,
Naglapata ang mga shrapnels kg nanurok sa mga
masa nga daw binhi,
Nagtubo ini kg nagpakig-away sa nagabagang
duta

Wala mo gin-iyangan ang kada lupok sg Machine
Gun,

Ginhalungan ang taga ka elemento para sa
mapanghiway nga pwersa
Sa dalayon nga pagpas-an, ang bug-at nagamag-
an
Kay nakahibalo ka, wala ka naga-isahanon sa ini'ng
Rehong kawsa.

Sa sining de kalibre nga mga Armas,
Si Exor nabuhi kg namatay.

Nabuhi nga nagatuon maghigugma sa Proletaryong
sahi
Kag namatay.
Napamatay nga nagahigugma sa Proletaryong
sahi,
Napatay kg magakabuhi liwat.

Mabuhi sa mga lupok sg pula nga pusil,
Mabuhi sa kada depensiba kg opensibang aksyon,
Mabuhi sa mga Politikal nga pagtuon,
Mabuhi sa mga pagsaway kg pagsaway sa
kaugalingon,

Mabuhi si Ka Exor nga kadalag-an sa Rebolusyon!

